

萬 有 文 庫

第 二 集 七 百 種

王 雲 五 主 編

宋 詩 鈔

(五 十)

呂 留 良 吳 之 振 吳 自 牧 選

李 宣 龔 校

商 務 印 書 館 發 行

宋詩鈔

(五)

呂留良吳之振吳自牧選

李宣驥校

國學基本叢書

# 石湖詩鈔

范成大。字致能。吳郡人也。紹興擢進士第。授戶曹監和劑局。遷正字。累遷著作佐郎。除吏部郎官。奉祠。起知處州。入爲禮部員外郎。兼崇政殿大學士。使金國歸。除中書舍人。出知廣西靜江府。除敷文閣待制。四川制置使。召對。除權吏部尚書。拜參知政事。奉祠起。知明州。除端明殿學士。尋帥金陵。進資政殿學士。再領洞霄宮。加大學士。卒。所居石湖。在太湖之濱。阜陵宸翰扁之。其詩緜而不釀。縮而不窮。新清嫵媚。奄有鮑謝。奔逸俊偉。窮追太白。當是時。石湖與楊誠齋陸放翁尤遂。初皆南渡之大家也。誠齋言。余於詩豈敢以千里畏人者。而於公獨斂衽焉。

## 河豚嘆

飯生藜苳腸。食事一飽足。腥腐色所難。況乃衷酰毒。膨亨強名魚。殺氣孕慘黷。既非養生具。宜謝砧几酷。吳儂眞差事。網索不遺育。捐生決下箸。縮手汗童僕。朝來里中子。饑吻不待熟。濃睡喚不磨。已落新鬼錄。百年三寸咽。水陸富肴藪。一物不登俎。未負將軍腹。爲口忘計身。饕死何足哭。作俑者誰歟。至今走末俗。或云先王意。除惡如薶菽。逆梟與毒獍。歲歲參幣玉。芟夷入薦羞。蓋欲殲種族。死生有定數。斷命烏可續。適丁是時者。未易一理局。醜鼎子公怒。羊羹華元覲。異味古所珍。無事苦畏縮。駢頭訶此語。戒諭祇取瀆。

聾盲死不悟。明知諒已燭。

續長恨歌七首

金盤激灩曉粧寒。國色天香勝牡丹。白鳳詔書來已暮。六宮鉛粉半春闌。  
紫微金屋閉春陽。石竹山花卻自芳。莫道故情無覓處。領巾猶有隔生香。  
聞道蓬壺重見時。瘦來全不耐風吹。無端卻作塵間念。已被仙宮聖得知。  
別後相思夢亦難。東虛雲路海漫漫。仙凡頓隔銀屏影。不似當時取次看。  
人似飛花去不歸。蘭昌宮殿幾斜暉。百年只有雲容姊。留得當時舊舞衣。  
驪山六十二高樓。突兀華清最上頭。玉羽川長湘浦暗。三郎無事更神遊。  
帝鄉雲馭若爲留。八景三清好在否。玉笛不隨雙鶴去。人間猶得聽梁州。

過平望

寸碧闌高浪。孤墟明夕陽。水柳搖病綠。霜蒲蘸新黃。孤嶼乍舉網。蒼烟忽鳴榔。波明荇葉顫。風熟蘋花香。  
鷄犬各村落。蓴鱸近江鄉。野寺對客起。樓陰濯滄浪。古來離別地。清詩斷人腸。亭前舊時水。還照兩鴛鴦。

長安開

斗門貯淨練。懸板淙驚雷。黃沙古岸轉。白屋飛簷開。是間袤丈許。舳艫蔽川來。千車擁孤隧。萬馬盤一坏。

篙尾亂若雨。檣竿束如堆。摧摧勢排軋。洶洶聲喧豗。偪仄復偪仄。誰肯少徘徊。傳呼津吏至。弊蓋凌高埃。嘒嘒譏譏征。叫怒不可裁。吾觀舟中子。一一皆可哀。大爲聲利驅。小者飢寒催。古今共來往。所得隨飛灰。我乃畸旅人。胡爲乎來哉。

兩木

壬申五月。病臥北窗。惟庭柯相對。手植綠橘。枇杷。皆森然出屋。枇杷已著子。橘獨十年不花。各賦一首。枇杷昔所嗜。不問甘與酸。黃泥裹餘核。散擲籬落間。春風拆勾萌。樸嫩如榛菅。一株獨成長。蒼然齊屋端。去年小試花。瓏瓏犯冰寒。化成黃金彈。同登桃李盤。大鈞播羣物。斡旋不作難。樹老人何堪。攬鏡覓朱顏。頷髭爾許長。大笑欷巾冠。

綠橘生西山。得自髯翁家。云此接活根。是歲當著花。俛仰乃十霜。垂蠹紛相遮。芳意竟寂寞。枯枝謾槎牙。風土諒非宜。翁言豈予夸。會令返故山。高深謝汚邪。石液滋舊根。山英擢新葩。黃團掛霜實。大如螳峒瓜。當有四老人。來駐七香車。

落鴻

落鴻聲裏怨關山。淚濕秋衣不肯乾。只道一番新雨過。誰知雙袖倚樓寒。

浙江小礮春日

客裏無人共一杯。故園桃李爲誰開。春潮不管天涯恨。更捲西興暮雨來。

二月三日登樓有懷金陵宣城諸友

百尺西樓十二欄。日遲花影對人閒。春風已入片時夢。寒食從今數日間。折柳故情都望斷。落梅新曲與誰關。詩成欲訪江南便。千里煙波萬疊山。

代聖集贈別

一曲悲歌水倒流。尊前何計緩千憂。事如夢斷無尋處。人似春歸挽不留。草色粘天鷓鴣恨。雨聲連曉鷓鴣愁。迢迢綠浦帆飛遠。今夜新晴獨倚樓。

寒食郊行書事二首

野店垂楊步。荒祠苦竹叢。鷺窺蘆泊水。烏啄紙錢風。媪引濃粧女。兒扶爛醉翁。深村時節好。應爲去年豐。隴麥欣欣綠。山桃寂寂紅。帆邊漁蕩浪。木末酒旗風。信步隨芳草。迷途問小童。賞心添腳力。呼渡過溪東。

初夏二首

清晨出郭更登臺。不見餘春只麼回。桑葉露枝蠶向老。菜花成莢蝶飛來。晴絲千尺挽韶光。百舌無聲燕子忙。永日屋頭槐影暗。微風扇裏麥花香。

曉行

篝燈驛吏喚人行。寥落星河向五更。馬上誰驚千里夢。石頭岡下小車聲。

秦淮

不將行李試開關。誰信江湖道路難。腸斷秦淮三百曲。船頭終日見方山。

白鷺亭

倦遊客舍不勝閒。日日清江見倚欄。少待西風吹雨過。更從二水看淮山。

脂井三首

昭光殿下起樓臺。拌得山河付酒盃。春色已從金井去。月華空上石頭來。  
午睡醒來一夢非。匆匆玉樹逐春歸。臙脂卻作千年計。不似愁魂四散飛。  
腰支旅拒更神遊。桃葉山前水自流。三十六書都莫恨。煩將歌舞過揚州。

九月三日宿胥口始聞雁

故人久不見。乍見雜悲喜。新雁如故人。一聲驚我起。把酒不能觴。送目問行李。曾云行路難。空濛千萬里。  
塞北多關山。江南渺雲水。風高吹汝瘦。旅伴今餘幾。斜行不少駐。滅沒蒼煙裏。羈遊吾亦倦。客程殊未已。  
扁舟費年華。短纜繫沙尾。物性各有役。冥心聽行止。江郊匝地熱。塲圃平如砥。歸期且勿念。共飽豐年米。

姑惡

姑惡水禽以其聲得名。世傳姑虐其婦，婦死所化。東坡詩云：姑惡姑惡，姑不惡，妾命薄。此句可以泣鬼。余行茗書始聞其聲，晝夜哀厲不絕，客有惡之，以爲此必子婦之不孝者。余爲作後姑惡詩。姑惡婦所云，恐是婦偏辭。姑言婦惡定有之，婦言姑惡未可知。姑不惡，婦不死，與人作婦亦大難。已死人言尙如此。

大暑舟行含山道中雨驟至霆奔龍挂可駭

隕雲暖前驅，連鼓訶後殿。駸駸失高丘，擾擾暗古縣。白龍起幽蟄，黑霧佐神變。盆傾耳雙噴，斗暗目四眩。帆重腹逾飽，櫂潤鳴更健。圓漪暈雨點，濺滴走波面。伶俜愁孤鴛，颺閃亂飢燕。麥老枕水臥，秧稈與風戰。牛踐炭城沈，蟻隧洶瓴建。水車競施行，歲事敢休宴。啞啞嘯簧鳴，輾轡連鎖轉。駢頭立婦子，列舍望宗伴。東枯駭西潰，寸涸驚尺澱。嗟予豈能賢，與彼亦何辨。扁舟風露熟，半世江湖徧。不知憂稼穡，但解加餐飯。遙憐老農苦，敢厭遊子倦。

題畫卷二首

鑿落秋水石，明高楓老柳。兩灘橫君看，疊巘雲容變。又有中宵雨，意生欹傾棧。路繞山，明隔隴人家犬吠聲。無限白雲堆去路，不知誰識許宣平。

立春日郊行



竹擁溪橋麥蓋坡。土牛行處亦笙歌。麴塵欲暗垂垂柳。醅面初明淺淺波。日滿縣前春市合。潮平浦口暮帆多。春來不飲無兼句。奈此金旛綵勝何。

晚潮

東風吹雨晚潮生。疊鼓催船鏡裏行。底事今年春漲小。去年曾與畫橋平。

一篙

一篙新綠浦東西。雪絮漫江雁不飛。宿雨纔晴風又轉。片帆那得及時歸。

碧瓦

碧瓦樓前繡幙遮。赤欄橋外綠溪斜。無風楊柳漫天絮。不雨棠梨滿地花。

暮春上塘道中

客舍無煙野水寒。競船人醉鼓闌珊。石門柳絮清明市。洞口桃花上巳山。飛絮著人春共老。片雲將夢晚俱還。明朝遮入長安道。慚愧江湖釣手閒。

餘杭道中

落花流水淺深紅。盡日帆飛繡浪中。桑眼迷離應欠雨。麥鬚騷殺已禁風。牛羊路杳千山合。雞犬村深一徑通。五柳能消多許地。客程何苦鎮匆匆。

陳侍御園上坐

愁眼逢歡春水明。詩情得酒春雲生。花梢蝴蝶作團去。竹裏鶉鳩相對鳴。邂逅浮生此日好。纏綿俗累何時輕。擘牋沫墨乏奇句。擷笛當筵慚妙聲。

獨遊虎跑泉小庵

苔徑彎環入。茅齋取次成。蔓花緣壁起。閒草上階生。宿雨松篁色。新晴燕雀生。筒泉烹御米。聊共老僧傾。

樂神曲

豚蹄滿盤酒滿杯。清風瑟瑟神欲來。願神好來復好去。男兒拜迎女兒舞。老翁翻香笑且言。今年田家勝去年。去年解衣折租價。今年有衣著祭社。

繰絲行

小麥青青大麥黃。原頭日出天色涼。姑婦相呼有忙事。舍後養繭門前香。繰車嘈嘈似風雨。繭厚絲長無斷縷。今年那暇織絹著。明日西門賣絲去。

田家留客行

行人莫笑田家小。門戶雖低堪灑掃。大兒繫驢桑樹邊。小兒拂席軟勝氈。木臼新春雪花白。急炊香飯來看客。好人入門百事宜。今年不憂蠶麥遲。

催租行

輸租得鈔官更催。踉蹌里正敲門來。手持文書雜嗔喜。我亦來營醉歸爾。牀頭慳囊大如拳。撲破正有三百錢。不堪與君成一醉。聊復償君草鞋費。

癸亥日泊舟吳會亭

去年春盤浙江驛。湛湛清波動浮石。今年春盤吳會亭。冥冥細雨濕高城。天邊作客風沙裏。去年今年成老矣。客心古井冷無波。過眼人情亦如水。憶昔三生住翠微。偶來平地著征衣。山中故人應大笑。扁舟坐穩何當歸。

題開元天寶遺事四首

御前羯鼓透春空。笑覺花奴手未工。一曲打開紅杏蕊。須知天子是天公。  
謝蠻舞袖貴妃絃。秦國如花競國妍。不賞纏頭三百萬。阿姨何處費金錢。  
朝天車馬詔頻催。劇得新湯未敢開。忽報豬龍掀宇宙。阿瞞空讀相書來。  
剝啄延秋屋上烏。明朝箭道入東都。宮中亦有風流陣。不及漁陽突騎粗。

半塘

柳暗開門逗曉開。半塘塘下越溪回。炊烟擁棹船船過。芳草綠堤步步來。

楓橋

朱門白壁枕彎流。積李無言滿屋頭。牆上浮圖路傍喚。送人南北管離愁。

橫塘

南浦春來綠一川。石橋朱塔兩依然。年年送客橫塘路。細雨垂楊繫畫船。

天平寺

舊遊彷彿記三年。轟飲題詩月滿山。山上白雲應解笑。又將塵土浣朱顏。三年前至。先兄與予同唐少梁登山絕頂。比歸絕路。捫蘿而下。夜巳午。住持僧散。遣羣僮秉燭。求余三人。久而莫得。以爲巳仙也。是夜宿寺中。聯句達曉。東坡曰。自從有此山。白石封蒼苔。何嘗有此樂。將去復徘徊。至今往來于余心。

賀樂丈先生南郊新居

新堂燕雀喜。竹籬挂籐籬。崩奔風濤裏。得此巢龜荷。西山效爽氣。南浦供清波。會心不在遠。容膝何須多。先生淮海俊。踏地嘗兵戈。飄飄萬里道。芒鞋厭關河。風吹落下邑。楚語成吳歌。豈不有故國。荒垣鞠秋莎。無庸說當歸。到處皆南柯。卜遷不我遐。一水明青羅。門戶長獨佳。奈客剝啄何。會令蒼苔石。屐齒如蜂窠。

田舍

呼喚攜鉏至。安排斜圃忙。兒童眠落葉。烏雀噪斜陽。煙火村聲遠。林菁野氣香。樂哉今歲事。天末稻雲黃。

病中夜坐

村巷秋春遠。禪房夕磬深。飢蚊嘗遠鬢。暗鼠忽鳴琴。薄薄寒相中。稜稜瘦不禁。時成洛下詠。卻似越人吟。  
十一月十二日枕上曉作

竹響風成陣。窗明雪已花。柴扉冷凍犬。紙瓦啄飢鴉。宿酒欺寒力。新詩管歲華。日高猶擁被。麝食媿鄰家。  
除夜書懷

運斗寅杓轉。周天日御回。夜從冬後短。春逐雨中來。鬢綠看看雪。心丹念念灰。有懷憐斷雁。無思惜疎梅。絮厚眼生纈。蔬寒腸轉雷。燭花紅瑣碎。香霧碧徘徊。昨夢書三篋。平生酒一盃。牀頭新曆日。衣上舊塵埃。搖落何堪柳。紛紜各夢槐。隙光能幾許。世事劇悠哉。岐路東西變。羲娥日夜催。頭顱原自覺。懷抱故應開。踴躍金何喜。青黃木自災。身謀同斥鷃。政爾願蒿萊。

題張氏新亭

水楊成幄翠相遮。猶有東風管物華。葉底青梅無數子。梢頭紅杏不多花。煩將練火炊香飯。更引長泉煮鬪茶。約我詩成須疥壁。莫嗔欹側似歸鴉。

病中絕句八首

空裏情知不著花。逢場將病作生涯。蒲團軟暖無時節。夜聽蚊雷曉聽鴉。  
溽暑熏天地湧泉。彎跽避濕挂行纏。出門斟酌無忙事。睡過黃梅細雨天。

石鼎饜飜夜煮湯。亂拋參朮鬪溫涼。化兒幻我知何用。祗與人間試藥方。  
病中心境兩俱降。猶憶江湖白鳥雙。一夜雨聲鳴紙瓦。聽成飛雪打船窗。  
簾頭排溜密如簾。溪上層陰寒解巖。最是看山奇絕處。白雲堆絮擁青尖。  
夜合稍頭醮紫茸。葦葱頂上折黃封。去年團扇題詩處。依舊疎簾細雨中。  
盆傾瓴建夜翻渠。遶屋蛙聲一倍粗。想見西堂渾不睡。明朝踏濕看菖蒲。  
晴色先從喜鵲知。斜陽一抹照天西。竹雞何物能無賴。如許泥深更苦啼。

雲間湖光亭

微風不動斂濤湍。組練晶晶色界寒。斜照發揮猶未盡。月明殘夜更來看。

雪霽獨登南樓

雪晴風勁晚來冰。樓上奇寒病骨驚。雀啄空簷銀筍墮。鴉翻高樹玉塵傾。青帘閃閃千家靜。黃帽亭亭一  
水橫。坐久天空卻溫麗。一彎新月對長庚。

上沙遇雨快涼

刮地風來健葛衣。一涼便覺暑光低。雲頭龍挂如垂筍。雨在中峯白塔西。

自天平嶺過高景庵

卓筆峰前樹作團。天平頂上石成關。綠陰匝地無人過。落日秋蟬滿四山。

曉自銀林至東灞登舟寄宣城親戚

曉山障望眼。脉脉紫翠橫。澄江已不見。況乃江上城。結束治野裝。木末浮三星。羸馬隴頭嘶。小車谷中鳴。亭亭東灞樹。練練綠浦明。篙師笑迎我。新漲沒蘋汀。徑投一葉去。雲水相與平。聊將塵土面。照此玻璃清。懷我二三友。高堂晨欲興。風細桐葉墮。露濃荷蓋傾。凝香繞燕几。安知路傍情。

復自姑蘇過宛陵至鄧步出陸

槳家饋食僅爲藩。酒市停驂竹廡門。紅樹亭亭棲晚照。黃茅杳杳被高原。飲溪有迹於菟過。掠草如飛朴渥翻。車軌如溝平地少。飽帆天鏡憶江村。

南塘冬夜唱和

燃萁烘暖夜窗幽。時有新詩趨唱酬。爲問灞橋風雪裏。何如田舍火爐頭。寒缸欲暗吟方苦。凍筆難驅字更遒。絕笑兒癡生活淡。略無歲晚稻粱謀。

花山村舍

深退灘灘露。沙虛岸岸頽。澗聲穿竹去。雲影過山來。柳菌粘枝住。桑花共葉開。庵廬少來往。門巷濕蒼苔。

清明日狸渡道中

灑灑沾巾雨。披披側帽風。花然山色裏。柳臥水聲中。石馬立當道。紙鷲鳴半空。墻間人散後。鳥鳥正西東。

南塘寒食書事

埂外新陂綠。岡頭宿燒紅。裹魚蒸菜把。饋鴨鎖筠籠。酒侶晨相命。歌場夜不空。土風并節物。不與故鄉同。

高淳道中

路入高淳麥更深。草泥沾潤馬駸駸。雨歸隴首雲凝黛。日漏山腰石滲金。老柳不春花自蔓。古祠無壁樹空陰。一簞定屬前村店。袞袞炊煙起竹林。

宿牧馬山勝果寺

佛燈已暗還吐。旅枕纔安卻驚。日色看成曉色。溪聲聽作松聲。

自寧國溪行至宣城舟人云凡百八十灘

波驚石險夜喧雷。晚泊旗亭笑眼開。休問行人緣底瘦。適從百八十灘來。

晚步西園

料峭清寒結晚陰。飛來院落怨春深。吹開紅紫還吹落。一種東風兩樣心。

早發竹下

結束晨粧破小寒。跨鞍聊得散疲頑。行衝薄薄輕輕霧。看放重重疊疊山。碧穗炊烟當樹直。綠紋溪水趁



橋灣清禽百囀似吟客。正在有情無思間。

後催租行

老父田荒秋雨裏。舊時高岸今江水。傭耕猶自抱長飢。的知無力輸租米。自從鄉官新上來。黃紙放盡白紙催。賣衣得錢都納卻。病骨雖寒聊免縛。去年衣盡到家口。大女臨歧兩分首。今年次女已行媒。亦復驅將換升斛。室中更有第三女。明年不怕催租苦。

次韻子文衝雨迓使者道聞子規

夢魂翾蝶翅。鼻息吼鼙鼓。喚起治曉粧。馬嘶僮僕語。汨泥溷鳧鶩。慚愧黃鵠舉。猥吟陔隅池。浪廢桔槔圃。啼鵲撩客心。鉤引着何許。請歌蘇仙詞。歸耕一犁雨。

次溫伯用林公正劉慶充倡和韻

前山後山梅子雨。屯雲日夜相吞吐。長林絕壑望不到。時有樵歸說逢虎。奔溪朝來忽怒漲。夾岸柳梢餘尺許。屋頭未放濃嵐散。苦憶清光泛瓊宇。客行落此亂山中。但欲尋人訴羈旅。比鄰邂逅得清士。眉宇津津佳笑語。杯行起舞出新句。我氣已衰聊復鼓。明年與君航太湖。扁舟踏浪不踏土。沈沈玉柱闕仙局。矯矯虹梁浮水府。目力無窮天不盡。卻笑向來誰縛汝。

次韻溫伯謀歸

官路驅驅易折肱。官曹隨處是愁城。隨風片葉鄉心動。過雨千峰病眼明。一櫛何須嘗世味。寸田久已廢吾耕。羨君早作歸歟計。屈指從今幾合并。

慶充自黃山歸。索其道中詩。書一絕問之。

鳴騶如電馬如雷。知是婆娑醉尉回。常日錦囊猶有句。況從三十六峯來。

賞雪騎鯨軒。子文夜歸。酒渴。侍兒薦茗飲。蜜漿。明日以詫同遊。戲爲書事。邀宗偉同作。

溪山四時佳。今夕更奇絕。天公妙莊嚴。施此一川雪。飛花浩如海。眩轉寒空闊。水西萬株樹。玉塔照銀闕。碧漢不受凍。長灘清瀉咽。漁舟晚猶泛。樵擔寒未歇。懸知畫不到。未省詩能說。歸來強搜句。冰硯冷於鐵。不如嚴夫子。迎門生暖熱。梅香不可耐。但覺酒腸渴。蜜融花氣動。茶泛乳膏發。寧辭春筍寒。爲暖花瓷滑。瞢騰畫屏暖。喚起眼餘纈。喚我獨何事。作此淡生活。想像高唐賦。何如徑排闥。

雪後守之家梅未開。呈宗偉。

瓦溝凍殘雪。簷溜黏輕冰。破寒一竿日。春隨人意生。端葉再三白。南枝尙含情。定知司花女。未肯嫁娉婷。官居若無賴。一笑如河清。落木露荒山。寒溪遶孤城。朝莫何所見。雲黃叫飢鷹。東風不早計。愁眼何當明。北鄰小橫斜。薜地可班荆。憑君趣花信。把酒撼瓊英。

次韻宗偉閣番樂

十日閒愁晝掩關。起尋一笑共清歡。罷休詩社工夫淡。洗淨書生氣味酸。盡遣餘錢付桑落。莫隨短夢到槐安。綉靴畫鼓留花住。剩舞春風小契丹。

五月聞鶯二首

桑陰淨盡麥頭齊。江上聞鶯每歲遲。不及曉風鴨鴨子。迎春啼到送春時。一聲初上最高枝。忙殺嘔啞百舌兒。老盡西園千樹綠。卻憐槐眼正迷離。

送子文雜言

陰谷雲低梅雨多。黃山滌源溪湧波。南風匝地送歸客。雙槳下瀨如投梭。嚴夫子。君舉酒。我其爲君歌。萬山叢叢石鑿鑿。官居破屋巢烟蘿。杜鵑曉啼猿莫叫。客行到此真蹉跎。窮愁無復理。一飲三嘆息。城東饕舍有佳人。邂逅使我加餐食。同鄉更同調。目擊心已傳。蟄蟲欲作雷奮地。萬籟方寂風行山。吹竽喚我醒。連鼓相追攀。鸞車電轂不可輦。但覺兩腋生飛翰。狂歌不必終曲。戲弈不必滿局。有時不揖上馬去。出門大笑驚僮僕。窮鄉眼冷見未曾。道上囁嚅相指目。云此陔隘何以有。二士直恐翩翩跨黃鵠。廣文組解登王畿。諸公貴人爭勸歸。常日心期有定論。贈行不惜重費詞。腰金佩玉衆目好。折簡沈碑千載癡。一尊有意重山嶽。五鼎無心輕網絲。嚴夫子。應領略。別後頻書相發藥。我旣爲萬頃之狎鷗。君勿作九臯之鳴鶴。

新館

露稻黏明璫。風芽衰高浪。荒荒白楊道。行行亂蟲響。日腳午未吐。雲頭晚猶漲。欣此半日涼。藍輿走清曠。病客不堪暑。茲行天肯相。蚊蟲掃無迹。秋意滿千嶂。相尋泉石盟。略褫簿書障。鴿原定相念。因風報無恙。臨溪寺

萬山遶坼蛉。二水奔瀕洞。亭亭林中寺。金碧燦欄棟。解鞍得蒲團。臥受瓦爐供。少捐一炊頃。暫作百年夢。無人自驚覺。幽禽正清哢。倦客如殘僧。無力供世用。此行端爲山。紫翠迭迎送。漱井出門去。驚塵撲飛鞚。

盤龍驛

聞雞一唱罷。占星三斗沒。天高月徘徊。野曠山突兀。暗蛩泣草露。怨亂語還咽。涼螢不復舉。點綴稻花末。惟餘絡緯豪。悲壯殷林樾。小蟲亦何情。狐客心斷絕。魂驚板橋穿。足側石子滑。行路如許難。誰能不華髮。高城謾回首。疊嶂屹天闕。遙知秋衾夢。千里一飄忽。

竹下

松杉晨氣清。桑柘暑陰薄。稻穗黃欲臥。槿花紅未落。秋鶯尙嬌姘。晚蝶成飄泊。犬駭逐車馬。雞驚撲籬落。道逢行商問。平生幾芒屨。頰肩走四方。爲口不計腳。劣能滯簞瓢。何敢議囊橐。我亦糜斗升。三年去丘壑。二俱亡羊耳。未用苦商略。

寒亭

溝塍與澗合。隴畝抱山轉。向來六月旱。此地免焦卷。早穗已垂垂。晚苗猶剪剪。一川豐年意。比屋鬧雞犬。老農霜鬚髻。矍鑠黃犢健。自云足蹈地。常賦何能免。刈熟情人輸。不識長官面。康年無復事。但恐社酒淺。我亦有二頃。收拾尙可繭。懷哉笠澤路。歸鏟犁頭藪。

清逸江

微生本漁樵。長日渺江海。扣舷濯滄浪。尙說天宇隘。竭來車馬路。悒悒佳思敗。黃塵撲眉鬚。驅逐似償債。羸驂繫偈仄。狂犬吠荒怪。鄉心入旅夢。一葉舞澎湃。晨興過墟市。喜有魚蝦賣。眼明見清江。積雨助橫潰。褰裳喚扁舟。艤晚不勝載。不辭野渡險。弄水聊一快。

新嶺

瘦馬兀蒼騰。荒雞號蒼莽。絲窠冒朝露。籬落萬蛛網。宿雲拂樹過。飛泉擘山響。老桑踟潛蚪。怪蔓挂騰蟒。山行何許深。空翠滴羈鞅。釀愁積雨寒。破悶朝日放。曛曛赤幟張。昱昱金鉦上。浮動草花馥。清和野禽唱。僕夫有好語。沙平路如掌。惟憂三溪阻。橋斷山水漲。

送通守趙積中朝議請祠歸天台

城頭千峯青繞屋。城下灘流三百曲。誰云偈仄復偈仄。尙有高軒肯來辱。紅梅花下兩芳春。春風惠和如主人。搶攘塵土簿書裏。見此縑籍天球溫。厚祿故人車結轍。掉頭獨泛清溪月。不從世外得超然。世間誰

肯如公決。生平我亦一沙鷗。葦白蘆黃今正秋。送公使我歸思動。破烟衝雨憶扁舟。明年相見東山起。我亦煎茶石橋水。道逢篋笠把漁竿。卽是馬曹狂掾史。

送詹道子教授奉祠養親

新安學宮天下稀。先生孝友真吾師。斑衣誤作長裾曳。二年思歸今得歸。牋詞上訴人叵挽。璽書賜可羣公歎。青山百匝不留人。空留諸生遮望眼。白雲孤起越南天。向來恨身無羽翰。下馬入門懷橘拜。身今卻在白雲邊。鶴髮鬢鬢堂上坐。兒孫稱觴婦供果。世間此樂幾人同。看我風前孤淚墮。一盃送舟下水西。我欲贈言無好詞。徑須喚起東廣微。爲伊重補南陔詩。

嚴州

城府黃塵撲馬鞍。一篙重探水雲寒。耳邊眼底無公事。睡過嚴州二百灘。

釣臺

山林城市兩塵埃。邂逅人生有往來。各問此心安處住。釣臺無意壓雲臺。

富陽

不到江湖恰五年。歛山青透屋頭邊。富春渡口明人眼。落日孤舟浪拍天。

餘杭

春晚山花各靜芳。從教紅紫送韶光。忍冬清馥薔薇醞。薰滿千村萬落香。

插秧

種密移疎綠穉平。行間清淺穀紋生。誰知細細青青草。中有豐年擊壤聲。

曬繭

隔籬處處雪成窩。牢閉柴荆斷客過。葉貴蠶飢危欲死。尙能包裹一絲窠。

次韻甄雲卿晚登浮丘亭

賓筵舊歷三千客。燕榭新高十二城。潑墨雲頭連樹暗。垂絲雨腳溪過生。葛巾羽扇吾身健。雪碗冰甌子句清。從此相從須痛飲。故應此事勝公榮。

古風上知府祕書二首

神仙絕世立功行。聞清都。玉符賜長生。藹雲遊紫虛。雞犬爾何知。偶舐藥鼎餘。身輕亦仙去。罡風與之俱。俯視舊籬落。眇莽如積蘇。非無鳳與麟。終然似蟲魚。微物豈有命。政爾謝泥塗。時哉適丁是。邂逅真良圖。大鵬上扶搖。南溟聒天沸。斥鷃有羽翼。意滿蓬蒿裏。不如附驥蠅。掣電抹荆薊。誰云極么麼。俛仰且萬里。向來庭戶間。決起不踰咫。飄飄託方便。意氣乃如此。物生未可料。旦暮儻逢世。君看功名場。得失一交臂。

拄笏亭晚望

林泉隨處有清涼。山遶闌干客自忙。溪雨不飛虹尚飲。亂蟬高柳滿斜陽。

桑嶺

回腸山百盤。揮手天一握。俯驚危棧穿。仰詫飛石落。挽輿如挽舟。絕叫斷雙筰。怪蔓纏枯槎。瘠草披幽壑。此豈車馬路。誰云強刊鑿。人言遠遊好。呼來試着腳。

次景琳錄事贈別韻

放船鳴榔便秦吳。送別空煩長者車。宿霧鎖山常冪冪。斷雲將雨忽疎疎。高城五嶺花深處。短棹三江木落初。賴得溪流通尺素。蒲根仍有一雙魚。

客中呈幼度

手板頭衙意已慵。墨池書枕興無窮。釀泥深巷五更雨。吹酒小樓三面風。草色有無春最好。客心去住水長東。今朝合有家書到。昨夜燈花綴玉蟲。

送汪聖錫侍郎帥福唐

承明纔入又南州。重見旌旗照柁樓。道義平生無捷徑。風波隨處有虛舟。如公未可違文石。稽古何妨欠碧油。我亦登門煩著錄。此行無力爲王留。

長至日與同舍遊北山



歲晚山同色。湖平霧不收。寒雲低閣雪。佳節靜供愁。竹栢森嚴立。蒲荷索莫休。瘦筇知腳力。政爾耐清遊。  
次韻胡邦衡祕監

斯言向來立。千古敢疵瑕。有命孤蓬轉。何心勁箭加。人窮名滿世。天定客還家。回首冥恩怨。虛空不着花。  
送周子充左史奉祠歸廬陵

黃鵠飄然下九關。江船載月客俱還。名高豈是孤臣願。身退聊開壯士顏。傾蓋當年真旦暮。霑巾明日有河山。後期淹速都難料。相對猶憐鬢未斑。

送陸務觀修編監鎮江郡歸會稽待闕

寶馬天街路。烟蓬海浦心。非關愛京口。自是憶山陰。高興餘飛動。孤忠有照臨。浮雲付舒卷。知子道根深。  
見說雲門好。全家住翠微。京塵成歲晚。江雨送人歸。邊瑣風雷動。軍書日夜飛。功名袖中手。世事巧相違。  
送李仲鎮宰溧陽

相逢已歎十年遲。冷淡貧交又語離。玉筍換班通籍後。黃梅吹雨送帆時。月岩家世猶爲縣。仲鎮方叔孫也金澗溪山好賦詩。喚起酸寒孟東野。倒流三峽洗餘悲。

次韻子永雪後見贈

雪瓴待伴半陰晴。竟日簷冰溜雨聲。九陌泥乾塵未動。南山石露塔猶明。稍聞吉語占農事。便覺歸心勝

宦情想得村田來歲好。瓦盆嘉釀灌愁城。

與正夫朋元遊陳侍御園

沙際春風轉物華。意行聊復到君家。年年我是重來客。處處梅皆舊識花。官減不妨詩事業。地寒猶辨醉生涯。城中馬上那知此。塵滿長裾席帽斜。

正月十四日雨中與正夫朋元小集夜歸

燈市淒清燈火稀。雨中風帽笑歸遲。月明想在雲堆處。客醉都忘馬滑時。老去尊前花隔霧。春來句裏柳成絲。浮生不了悲歡事。作劇兒童總未知。

韓無咎檢詳出示所賦陳季陵戶部巫山圖詩。仰窺高作。歎息彌襟。余嘗考宋玉談朝雲事。漫

稱先王時本無據依。及襄王夢之。命玉爲賦。但云頽顏怒以自持。曾不可以犯干。後世弗察一切。溷以蝶語。曹子建賦宓妃。亦感此而作。此嘲誰當解者。輒用此意次韻。和呈以資撫掌。

瑤姬家山高插天。碧叢奇秀古未傳。向來題目經楚客。名字經度峨眉前。是邪非邪莽難識。喬林古廟常秋色。暮去行雨朝行雲。翠帷瑤席知何人。峽船一息且千里。五兩竿頭見幡尾。仰窺仙館至今疑。行人問訊居人指。千年遺恨何當申。陽臺愁絕如荒村。高唐賦裏人如畫。玉色頽顏元不嫁。後來飢客眼長寒。浪傳樂府吹復彈。此事牽連到溫洛。更憐塵鞮有無間。君不見天孫住在銀濤許。塵間猶作兒女語。公家春

風錦瑟傍。莫爲此圖虛斷腸。

次韻王夷仲正字同遊成氏園

秀巖堂上玉東西。把酒登臨望眼迷。天宇四垂黏地近。海山一抹帶潮低。絕知客好無塵事。聊記吾曾有醉題。倚賴羣仙聯姓字。他年誰敢一丸泥。是日諸公令予題壁

送吳智叔檢詳直中祕使闕

抗章襍被豈公難。已說高風立懦頑。客路莫嫌河畔草。直廬須愛道家山。秋生蓮蒲船初泛。春滿茶溪騎趣還。卻訪故人西府舊。定煩書札墮田間。

次韻韓無咎右司上巳汎湖

休沐良辰不待晴。徑稱閒客此閒行。春衫欺雨任教冷。病眼得山元自明。抹黛濃嵐圍坐晚。揉藍新綠沒篙清。棲鴉未到催歸去。想被東風笑薄情。

王園官舍睡起

公退閉閣臥官居。如淨舫屋角斷虹飲。日西楊柳黃。官來束我帶。客去書滿床。睡覺有忙事。煮茶翻斷香。

七月二日上沙夜泛

困倚船窗看斗斜。起來雨露滿天涯。亭亭宿鷺明菰葉。閃閃涼螢入稻花。月下片雲應夜雨。山根炬火忽

人家。江湖處處無窮景。半世紅塵老歲華。

長沙王墓在閭門外孫伯符

英雄轉眼逐東流。百戰工夫土一抔。蕎麥茫茫花似雪。牧童吹笛上高丘。

次韻耿時舉王直之夜坐

庭葉翻翻鬧。燈花粟粟穠。關山千里雁。風雨滿城鐘。隴上新登穀。江頭舊熄烽。今年吾計得。安穩讀三冬。

次韻馬少伊郁寂峰寄示同遊石湖詩卷三首

鏡面波光倒碧峰。半湖雲錦萬芙蓉。去年蕩槳香風裏。行傍石橋花正濃。紅皺黃團熟暑風。甘瓜削玉藕玲瓏。身謀已落園丁後。滿帽京塵日正中。得得來題小隱詩。拂花縈柳畫船移。湖邊好景春猶未。須到秋清月滿時。

與長文正夫遊北山

柳岸松門勝處通。馬蹄踏霧入空濛。春光有力欺遊子。天色無情沒斷鴻。雨腳遠連山腳暗。杏梢斜倚竹梢紅。駝裘擁鼻吾衰矣。年小猶嫌料峭風。

寓直玉堂拜賜御酒

歸鴉陸續墮宮槐。簾幙參差晚不開。小雨遂將秋色至。長風時送市聲來。近瞻北斗躔躔次。猶夢西山翠

碧堆慚愧君恩來。甲夜殿頭宣勸紫金杯。

李暈知縣作亭西湖上。余用東坡語名之曰飲綠。遂爲勝槩。

芷蒼蓮巢喚客遊。蘆鞭席帽爲君留。未論吹水堪添酒。且要移床學枕流。乍霽卻陰梅釀雨。暫暄還冷麥催秋。石湖也似西湖好。煩向蒼烟問白鷗。

送汪仲嘉待制奉祠歸四明分韻得論字。

丹霄碧海眇高騫。厭直承明卻自論。寶馬十年聽漏箭。扁舟一雨看潮痕。侍臣想憶松門遠。歸客還憐菊徑存。清潤要非山澤相。又煩一札下雲根。

初約鄰人至石湖

窈窕崎嶇學種園。此生丘壑是前緣。隔離石上浮天水。當戶山橫匝地烟。春入葑田蘆綻笋。雨傾沙岸竹垂鞭。荒寒未辦招君醉。且吸湖光當酒泉。

刈麥行

菊花開時我種麥。桃李花飛麥叢碧。多病經旬不出門。東陂已作黃雲色。腰鎌刈熟趁晴歸。明朝雨來麥帶泥。犁田待雨插晚稻。朝出移秧夜食麩。

壬辰九月十六日。侵晨真率會石湖路中書事。

白葛烏巾稱老農。溪南溪北水車風。稻頭的皪黏霜露。步入明珠翠網中。

雙燕

底處雙飛燕。銜泥上藥欄。莫教驚得去。畱取隔簾看。

春日三首

藥欄花暖小鴉眠。雪白晴雲水碧天。煮酒青梅寒食過。夕陽庭院鎖鞦韆。  
西窗一雨又斜暉。睡起熏籠換夾衣。莫放珠簾遮洞戶。從教燕子作雙飛。  
雙鯉無書直萬金。畫橋新綠一篙深。青蘋白芷皆愁思。不獨江楓動客心。

汴河

指顧枯河五十年。龍舟早晚定疏川。還京卻要東南運。酸棗棠梨莫翫然。

雷萬春墓在南京城南環以小墻榜曰忠勇雷公之墓

九隕元身不隕名。言言千載氣如生。欲知忠信行蠻貊。過墓胡兒下馬行。

宜春苑

狐塚獾溪滿路隅。行人猶作御園呼。連昌尚有花臨砌。腸斷宜春寸草無。

州橋

州橋南北是天街。父老年年等駕迴。忍淚失聲詢使者。幾時真有六軍來。  
宣德樓

曉闕叢霄舊玉京。御牀忽有犬羊鳴。他年若作清宮使。不挽天河洗不清。  
市街

梳行訛雜馬行殘。藥市蕭騷土市寒。惆悵軟紅佳麗地。黃沙如雨撲征鞍。

漸水

黃流日夜向南風。道出封丘處處逢。紫蓋黃旗在湖海。故應河伯欲朝宗。

舊滑州

大伾山麓馬徘徊。積水中間舊滑臺。漁子不知興廢事。清晨吹笛掉船來。

翠樓

連衽成帷迓漢官。翠樓沾酒滿城歡。白頭翁媪相扶拜。垂老從今幾度看。

臨洛鎮

竟日霜寒暮解圍。融融桑柘染斜暉。北人爭勸臨洛酒。云有棚頭得兔歸。

眞定舞

紫袖當棚雪鬱凋。曾隨廣樂奏雲韶。老來未忍耆婆舞。猶倚黃鐘衰六么。

內丘梨園

汗後驚梨爽似冰。花身耐久老猶榮。園翁指似還三歎。曾共翁身見太平。

望都

荒寺疎鐘解客鞍。由山東畔白煙寒。望都風土連唐縣。翁媪排門帶瘿看。

安肅軍

從古銅門控朔方。南城烟火北城荒。臺家抵死爭溘灤。滿眼秋蕪襯夕陽。

燕賓館

九日朝天種落驩。也將佳節勸盃盤。苦寒不似東籬下。雪滿西山把菊看。

龍津橋

燕石扶欄玉雪堆。柳塘南北抱城迴。西山剩放龍津水。畱待官軍飲馬來。

自石林回過小玲瓏。巖竇益奇昔爲富人吳氏所有。今一子尚幼。檢校於官。

一丘乃中虛。洞中四無礙。卻略巖岫杳。黝糾石狀怪。蒼牛飲前池。碧罇澁微瀨。雕鏤具百巧。圖畫窮千態。哀湍寫壞磴。凍雨濕空翠。疎梅照草棘。瘦竹枝蹊隧。當時閭閻子。目力有塵外。孤童藐難料。奇事疑有待。



誰歟千金招來換把茅蓋不仙亦足豪衆垓皆蠱塊我評北山遊絕勝此無對玲瓏詎可小孰能爲之大  
乾道己丑守括被召再過釣臺自和十年前小詩刻之柱間後五年自西掖帥桂林癸巳元日  
雪晴復過之再用舊韻三絕

浮生渺渺但飛埃問訊星官又獨來天上人間最高處爲君題作鬱蕭臺  
拙疎何計補涓埃慚愧雙旌去又來三過溪門今老矣病無腳力更登臺  
界天山雪淨黃埃江上扁舟夜泛來匝地東風勸椒酒山頭今日是春臺

豫章南浦亭泊舟二首

繡檻臨滄渚牙檣插暮沙浦雲沉斷雁江雨入昏鴉野曠天何近春寒歲未華朝來風一席隨處且浮家  
閨歲花光晚霜朝草色荒趁墟猶市井收潦再耕桑客路東西懶江流日夜忙長歌情不盡一酌醉滄浪  
清江臺在臨郡西岡上張安國題榜

南來富壽岡春勝此蟠結岑岬戴南臺欄檻了風月蕭灘曳長煙貝闕爛殘雪江流當帶橫練練浮木末  
天風來無鄉萬里吹醉纈登臨信奇事忍凍亦癡絕故人春夢覺遺墨秋蛇掣浮雲真可哈揮觴醉空闊  
初入湖南醴陵界

崖柳陰陰夾暝途出山歡喜見平蕪一春客夢飽風雨行盡江南聞鷓鴣

醴陵驛

綠水橋邊縣門前。柳已黃。人稀山木壽。土瘦水泉香。乍脫泥中滑。還嗟堠子長。櫛洲何日到。鼓枻上滄浪。

初見山花

三日晴泥尙沒鞦。幾將風雨過年華。湘東二月春纔到。恰有山櫻一樹花。

湘江舟尾快風挂帆

船頭雲浪吼奔雷。十丈高帆滿意開。我自只憑忠信力。風應不爲世情來。兒童屢惜峰巒過。將士猶教鼓角催。明日祝融天柱去。更煩先捲亂雲堆。

泊湘江魚口灘

知時社燕語檣竿。遊子奔波自鮮歡。趁客賣魚雙槳急。隔林沽酒小旗寒。瀟湘渾似日南落。嶽麓已從天外看。薄暮灘前收百丈。臥聞三老報平安。

馬鞍驛飯罷縱步

食飽勸輿馬。散策步前岡。意行踏芳草。蕭艾藉生香。存事甚寂寥。山桃帶松篁。游蜂入菜花。此豈堪蜜房。今年蠶出遲。柘葉分寸長。好晴纔數日。樂事未渠央。

黃鰲嶺

薄宦每遠已。茲行遂登危。峻阪盪胸立。恍若對鏡窺。傳呼半空響。濛濛上烟霏。木末見前驅。可望不可追。躋攀百千盤。有頃身及之。白雲叵攬擷。但覺沾人衣。高木傲燒痕。葱蘢茁新蕒。春禽斷不到。惟有蜀魄啼。謂非人所寰。居然見鉏犁。山農如木客。上下翺以飛。寧知有康莊。生死安嶮巖。室空了無處。恐尙檜巢棲。安得拔汝出。王路方清夷。

衡永之間。山路艱澀。薄晚吏卒闕云。漸近祈陽。路已平夷。皆有津津之色。

朝登赤土嶺。暮入黃泥谷。春江弄花月。歸夢恍在目。覺來行路難。杜宇叫高木。凹中泥沒踝。凸處石齧足。坐輿我尙病。想見肩輿僕。衡陽復祈陽。可暫不可宿。晚來出前岡。路坦亭堦促。將士走相賀。喜色如膏沐。人生本無悶。逆境要先熟。不從憂患來。安識平爲福。夷途不常遇。歷險始知足。

書浯溪中興碑後并序

乾道癸巳春三月。余自西掖出守桂林。九日渡湘江。遊浯溪。摩娑中興石刻。泊唐元和至今遊客所題。竊謂四詩各有定體。頌者美盛德之形容。以其成功告于神明者也。商周魯之遺篇。可以概見。今元子乃以魯史筆法。婉辭含譏。蓋之而章。而後來詞人。復發露之。則夫磨崖之碑。乃一罪案。何頌之有。竊以五十六字。刻之石榜。與來者共商略之。此詩之出。必有相詬病者。謂不合題。破次山此亦習俗固陋。不能越拘攣之見耳。余義正詞直。不暇卹也。

三頌遺音和者希。丰容寧有刺譏辭。絕憐元子春秋法。都寓唐家清廟詩。歌詠當諧琴搏拊。策書自管壁  
純疵。紛紛健筆剛題破。從此磨崖不是碑。

宿清湘城外田家

驅馬力猶彊。奏牀身始疲。淨淨雲拂帳。瀉瀉水鳴籬。未熟燈前夢。閒尋道上詩。湘中多夜雨。客枕最先知。  
次韻郭季勇機宜雪觀席上畱別

絕勝尊前萬事休。縱非吾土且登樓。山迎雨腳俄經過。風約江聲欲倒流。野水新堪添酒面。夕陽依舊滿  
簾鈎。凭欄從此遲歸鞅。能及中秋對月不。

次韻許季韶通判雪觀席上

把酒臨風瑞露傾。瓊漿何用謁雲英。捲簾雨腳銀絲挂。倚杖江頭綠漲生。嶺海一涼蘇暑病。山林千籟試  
秋聲。茲遊奇絕忘羈宦。慚愧烟中短棹橫。

送周直夫教授歸永嘉

青燈相對話儒酸。老去羈遊自鮮歡。昨夜榕溪三寸雨。今朝桂嶺十分寒。知心海內向來少。解手天涯良  
獨難。一笑不須論聚散。少焉吾亦跨征鞍。

贈趙廉州

馬羣雜踏草蒙茸。刮日權奇一洗空。天末也煩行李到。歲寒聊得酒尊同。梅花夜夜湘南雨。榕葉年年海北風。少待佳晴看山去。玉簫高插翠雲叢。

食罷書事

甲子霖涔雨。東南溼蟄風。荔枝梅子綠。萱萼杏花紅。捫腹蠻茶快。扶頭老酒中。荒隅經歲客。土俗漸相同。

次韻平江韓子師侍郎見寄三首

自古四愁湘水深。誰將城郭啓山林。有情碧嶂團纒繞。無數朱樓縹緲臨。蟬鼓揭天驚客座。象瓘航海厭蠻琛。三千客路長安遠。故舊書來直萬金。

靈泉杖屨浙江頭。經濟長懷尙典州。堂上讀書朝氣爽。臺前呼月海光浮。交情尺素勤雙鯉。筆力枯松挽萬牛。已把三章翻樂府。爲君擊節變蠻謳。

前年衝雪過雙溪。風帽泥韉騎吹隨。爛醉依前逢錦瑟。好音誰是欠黃鸝。功名未試玉璫瑛。離別頻傾金屈卮。疇昔北征煩吉夢。南征合有夢征時。

水鄉酌別但能之主管能之將過石康

南郭河橋市井喧。綠荷香處有江天。一簾梅雨鑪煙外。三疊陽關燭淚前。馬耳西山君並海。船頭北渚我歸田。後期直恐參商似。且醉金槽四十絃。

燕堂書事

歲稔齋鈴闕年。深屋暨摧。狸爭雷瓦過。螳化雨窗來。盡日風長籟。無時地不梅。耳邊情話少。笑口若爲開。

酒邊二絕

團扇香中嫋嫋風。斷腸聲裏看羞紅。不須過處催乾盞。聽徹歌頭盞自空。  
日長綉倦酒紅潮。閒束羅巾理六幺。新樣築毯花十八。丁寧小玉謾吹簫。

甘雨應祈三首

晚稻成苞未肯肥。鶉鳩啼曉雨來時。黃紬被冷初眠覺。先向芭蕉葉上知。  
秋日雖蒙霽霽沾。涸塵終恨太廉纖。今朝健起巡簷看。恰似廬山看水簾。  
高田一雨免飛埃。上水綱船亦可催。說與東江津吏道。打量今晚漲痕來。

畫工季友直。爲余作冰天桂海二圖。冰天畫使北虜渡黃河時。桂海畫佛子遊巖道中也。戲題。  
許國無功浪着鞭。天教飽識漢山川。酒邊蠻舞花低帽。夢裏胡笳雪沒羈。收拾桑榆身老矣。追隨萍梗意茫然。明朝重上歸田奏。更放岷山萬里船。

甲午除夜猶在桂林。念至一弟使虜。今夕當宿燕山會同館兄弟。南北萬里。感悵成詩。

把酒新年一笑非。鶴鶴原上巧相違。墨濃雲瘴我猶住。席大雪花君未歸。萬里關山燈自照。五更風雨夢

如飛。別離南北人誰免。似此別離人亦稀。

乙未元日用前韻書懷今年五十矣。

浮生四十九俱非。樓上行藏與願違。縱有百年今過半。別無三策但當歸。定中久已安心竟。飽外何須食肉飛。若使一丘并一壑。還鄉曲調盡依稀。

再用前韻時被命帥蜀

休論今昨總皆非。世味誠甘與我違。蜀道雖如履平地。杜鵑終勸不如歸。三冬自若生毛穎。一夢微官陪蠶飛。夜久南枝翻倦鵲。茫茫月白衆星稀。

施元光在崑山病中遠寄次韻答之。

四海飄蓬客舍邊。幾多雲水與風煙。絕無膂力驅長轡。空有孤忠誓大川。參井忽隨征馬上。斗牛應挂故山前。親交情話知何許。詩到天涯喜欲顛。

鑄觜

導江自海陽。至縣迺瀾迤。狂瀾既奔傾。中流遇鑄觜。分爲兩道開。東灘北湘水。至今舟楫利。楚粵經萬里。人謀效天造。史祿所經始。無謂秦無人。虎鼠用否耳。紫藤纏老蒼。白石溜清泚。是間可作社。牲酒百世祀。修慶者誰歟。配以臨川季。

清湘縣郊外。雜花盛開。有懷石湖。

午行清湘縣。妍暖春事嘉。柴關鬧桃李。冥冥一川花。故園豈少此。愈此百倍加。我寧不念歸。願作失木鴉。百年北窗涼。安用一天涯。君恩重喬嶽。敢計征路賒。鄉心與官身。鑿柄方聳牙。橘柚走珍貢。何如繫匏瓜。明當復露奏。天日臨幽遐。倘許清河使。曳尾還汙邪。

珠塘

林茂鳥烏急。坡長鱸馱鳴。坐輿猶足痺。負笈想肩頰。廢廟藤遮合。危橋竹織成。路傍行役苦。隨處有柴荆。

題湘山大施堂

重倚春林淚竹枝。南遊風物鬢成絲。難尋桂海千峯夢。更了湘山一段奇。來去別無心外法。行藏休問塔中師。若論大施門前事。竿木逢場且賦詩。

深溪鋪中二絕。追路寄呈元將仲顯二使君。

賀州歸去柳州還。分路千山與萬山。把酒故人都別盡。今朝真箇出陽關。祇有南風捲路塵。斷無南客送車輪。故人合在瀟湘見。卻見瀟湘別故人。

湘口夜泊。南去零陵十里矣。營水來自營道。過零陵下湘水。自桂林之海陽。至此與營會合。爲

一江。



我從清湘發源來。直送湘流入營水。故入亭前合江處。暮夜檣竿轟沙尾。卻從湘口望湘南。城郭山川恍難紀。萬壑千巖詩不徧。惟有蒼苔痕屐齒。三年瘴霧亦奇絕。浮世登臨如此幾。湖南山色夾江來。無復瑤簫插天起。陂陀狼石蹲清漲。淡蕩光風浮白芷。騷入魂散若爲招。傷心極目春千里。我亦江南轉蓬客。白鳥愁烟思故壘。遠遊雖好不如歸。一聲鷓鴣花如洗。

題嶽麓道卿臺

山外江水黃。江外滿城綠。城外杳無際。天低到平陸。長烟貫楚尾。遠勢帶吳蜀。故園東北望。遊子欄干曲。連日風作洞庭不可渡。出赤沙河。

金沙堆前風未平。赤沙河邊波不驚。客行但逐安穩去。三十六灣漲痕生。滄洲寒食春亦到。荻芽深碧蘘芽青。汨羅水飽動荆渚。嶽麓雨來昏洞庭。大荒無依飛鳥絕。天地惟有孤舟行。慷慨悲歌續楚些。彷彿幽瑟迎湘靈。黃昏慘淡艤極浦。雖有漁舍無人聲。冬湖落瀉此暫住。春潦怒漲隨傭耕。吾生一葉寄萬里。況復搖落浮滄溟。漁蠻尙自有常處。羈宦方汝尤飄零。

泊衡州

客裏仍哦對雨吟。夜來星月曉還陰。空江十日無春事。船到衡陽柳色深。

步入衡山

應有人家住隔溪。綠陰亭午但聞雞。松根當路龍筋瘦。竹筍滿山鳳尾齊。墨染安雲猶似瘴。絲來小雨不成泥。更無騎吹喧相逐。散誕閒身信馬蹄。

四明人董嶧久居嶽市乞詩

祝融峯下兩逢春。雨宿風淪老病身。莫笑五湖萍梗客。海邊亦有未歸人。

鼎湖

漂泊離巢燕。彎跽負殼蝸。瘦嫌莞席硬。老覺畫屏奢。報道帆當落。傳呼鼓已撾。且投人處宿。未到已聞臺。

安鄉縣西晚泊

水闊鳥烏倦。墟寒僮僕飢。一灣村縣過。百折暮江遲。曉夢孤燈見。春陰病骨知。簡書寧不畏。臂力奈先疲。

孫黃渡

捨舟從陸更聞關。徑仄仍荒亦未乾。棘刺近人牢閉眼。泥塗兀馬緊扶鞍。茶山盜藪路程惡。麥隴人家懷抱寬。擔僕與夫盡劬瘁。病翁那得更加餐。

發荊州

初上蓬籠竹竿船。始知身是劍南官。沙頭沽酒市樓暖。徑步買薪江墅寒。自古秦吳稱絕國。于今歸峽有名灘。千山萬水垂垂老。只欠天西蜀道難。

虎牙灘

傾崖溜雨色。慘淡水墨畫。辛夷碎花懸。瘦木老藤挂。翠莽楚甸窮。黃流蜀江下。一灘今始管。三峽此其亞。雨點鼓士撻。雲騰挽夫跨。驚心度石林。破眼見村舍。牛眠草色裏。犬吠竹林罅。步頭可檣船。安穩睡殘夜。

初入峽山效孟東野

峽山偪而峻。峽水湍以碻。峽草如毳毛。峽樹多膠枝。峽禽惟杜鵑。血吻日夜啼。峽馬類黃狗。不能長鳴嘶。峽曉虎跡多。峽暮人跡稀。峽路如登天。猿鶴不能梯。僕夫負屨哭。我亦呻吟悲。悲吟不成章。聊賡峽哀詩。

蛇倒退

山前壁如削。山後崖復斷。向吾遠隴首。如海到彼岸。那知下嶺處。慄甚履冰戰。牽前帶相挽。縮後衣盡綻。健倒轍尋丈。徐行塵分寸。上疑綠竹竿。下劇袞金彈。豈惟蛇退舍。飛鳥望崖反。稍喜一徑平。猶有千石亂。仍逢新燒畬。約略似耕畔。心知人境近。繫末百憂散。山民茅數把。鬼質犢子健。腰鑿走迎客。再拜復三嘆。謂匪人所蹊。官來定何幹。倘爲飢火驅。平地豈無飯。意者官事迫。如馬就羈絆。我乃不能答。付以一笑粲。

大丫隘

峽行五程無聚落。馬頭今日逢耕鑿。麥苗疎瘦豆苗稀。椒葉尖新稻葉薄。家家婦女布纏頭。背負小兒頰垂瘤。山深生理卻不乏。人有銀釵一雙插。

麻線堆

峽口驛前大山崛起，舊路攀援而上，縈紆如線。十五年前，浮圖德寶始沿澗伐木作新路，不復登山。余觀峽路，皆未嘗經修。感德寶之事，作麻線堆詩一首，以風夔路使者。及歸峽二州，長吏沈葉管熊四君，雲木盪胸起，鬱峨一峯危。上有路千折，纏縷如縈絲。是爲麻線堆，厥險天下稀。偪仄容半足，顛墜寧復稽。騰猿尙愁苦，遊子將安之。浮屠德寶者，悲智緒等慈。隨山刊古木，尋壑得長磯。輿梁捷飛度，布石綿階梯。自從新路改，重趼無齋咨。縣有孫少府，琬琰劄文詞。勿云此事小，惟有行人知。況觀峽山路，由來欠平治。官吏旣弗跡，誰肯深長思。天險固自若，當令路成蹊。土工運畚鍤，石工操鑿椎。烈火敗礮确，築沙填隙巖。多用百夫力，遠無五旬期。但冀米鹽給，不煩金幣支。非客敢竊議，道旁詢旄倪。身雖雪山戍，亦願助毫釐。工費嗟小哉，政須賢有司。東有管夷陵，西有葉秭歸。上維沈隱侯，夔臺今吏師。下維熊繹孫，長材佐州麾。豈吾金閨彥，不如林下緇。懸知議克合，了此一段奇。舟楫避潢潦，置郵疾飛馳。憧憧吳蜀客，來往當無時。仍磨鑽天石，大書四賢詩。不佞願秉筆，遠繼峽口碑。

判命坡

鑽天嶺上已飛魂，判命坡前更駭聞。側足二分垂壞磴，舉頭一握到孤雲。微生敢列千金子，後禍猶幾萬石君。早晚北窗尋噩夢，故應含笑老榆枌。

千石嶺

晨光挂高嶺。晴色媚遠客。哀湍吼叢薄。宿霧裊絕壁。露重鮮花紫。風來蓬背白。迷山朴渥跳。飲澗於菟迹。層巔多朽木。迭磴有飛石。不知山幾重。杳杳入叢碧。

四十八盤

詰曲不前如宦拙。欹傾當面似交難。若將世路比山路。世路更多千萬盤。

入秣歸界

山根繫馬得漿家。深入窮鄉事可嗟。蚯蚓崇人能作瘴。茱萸隨俗強煎茶。幽禽不見但聞語。野草無名都着花。窈窕崎嶇殊未艾。去程方始問三巴。

歸州竹枝歌二首

東鄰男兒得湘纍。西舍女兒生漢妃。城郭如村莫相笑。人家伐閼似渠稀。東岸艤船拋石門。西山炊煙連白雲。竹籬茅舍作晚市。青蓋黃旗稱使君。

巴東峽口

水宿頻欹側。徒行又險艱。舟危神女峽。馬瘦鬼門關。照夜燒畬隴。緣雲種笮山。催成頭雪白。休說髩絲斑。初入巫峽

讚火巴東岸。樅金峽口船。東江崖欲合。漱石水多漩。卓午三竿日。中聞一罇天。偉哉神禹跡。疏鑿此山川。

巫山高 并序

余舊嘗用韓无咎韻。題陳季陵巫山圖。考宋玉賦意。辨高堂之事甚詳。今過陽臺之下。復賦樂府一首。世傳瑤姬爲王母女。嘗佐禹治水。廟中石刻在焉。

溼雲不收煙。雨霏峽船作。灘梢廟磯。杜鵑無聲猿叫斷。惟有飢鴉迎客飛。西真功高佐禹跡。斧鑿鱗皴倚天壁。上有瑤簪十二尖。下有黃湍三百尺。蔓花蚪木風煙昏。鮮珮翠帷香火寒。靈旂飄忽定何許。時有行人開廟門。楚客詞章元是諷。紛紛餘子空嘲弄。玉色頰顏不可干。人間錯說高唐夢。

刺潰淖 并序

潰淖盤渦之大者。峽江水壯則有之。或大如一間屋。相傳水行峽底。遇暗石則潰起。已而下旋爲窩。然亦未嘗有定處。或無故突然而作。叵測也。舟行遇之。小則欹傾。大則與齋俱入。險惡之名聞天下。

峽江饒暗石。水狀日千變。不愁灘瀧來。但畏潰淖見。人言盤渦耳。夷險固有間。仍于非時作。未可一理貫。安行方巖穀。無事忽翻練。突如湯鼎沸。翁作茶磨旋。勢迫中成窪。怒霽外始暈。已定稍安尉。儵作更驚眩。漂漂浮沫起。疑有潛鯨噴。勃勃駭浪騰。復恐蟄鷺抃。篙師瞪襖魄。灘戶呀雨汗。遂巡怯大敵。勇往決鏖戰。幸免與齊入。還憂似蓬轉。驚呼招竿折。奔救竹竿斷。九死船頭爭。萬苦石上牽。旁觀競薄冰。撇過捷飛電。

前余叱馭來。險山固嘗徧。今者擊機誓。豈復憚波面。澎澎三峽長。颯颯一羣亂。旣微掬指。又匪科頭漫。天子賜之履。江神敢吾玩。但催壘鼓轟。往助雙槳健。

嘲峽石 并序

峽山江濱。亂石萬狀。極其醜怪。不可形容。舉非世間。諸所有石之比。走筆戲題。且以紀異。

峽山狠無情。其下多醜石。頑質賈憎垂。傀狀發笑啞。粗類墳壤黃。沈漬鐵矢黑。或如溝泥澆。或似東壁疥。堆疑聚廩粟。影若壞城甃。槎牙鏤朽木。狼籍委枯骨。礪礪包羸蛙。淋漓錮鉛錫。縱紋瓦溝隴。橫壘衣摺襞。鱗皴斧鑿餘。炊窞蹴踏力。云何清淑氣。孕此譎詭跡。我本一丘壑。嗜石舊成癖。端溪紫琳腴。洮河綠沉色。階册截肪膩。泗磬鳴球擊。嵌空太湖底。偶立韶江側。真陽劃千巖。營道劃寸碧。倦遊所閱多。未易一二籍。竭來茲山下。刺眼昔未覲。或云峽多材。奇秀鬱以積。絕代昭君村。驚世屈原宅。東家兩兒女。氣足豪萬國。山石何重輕。奚暇更融液。我亦味其言。作詩曉行客。

勞畚耕 并序

畚田峽中。刀耕火種之地也。春初斫山。衆木盡蹶。至當種時。伺有雨候。則前一夕火之。藉其灰以糞。明日雨作。乘熱土下種。卽苗盛倍收。無雨反是。山多礪确。地方力薄。則一再斫燒。始可藝。春耕麥豆餅餌。以度夏秋。則粟熟矣。官輸甚微。巫山民以收粟三百斛爲率。財用三四斛。了二稅。食三物。以終年。雖平

生不識秔稻而未嘗苦饑余因記吳中號多嘉穀而公私之輸頗重田家得粒食者無幾峽農之不若也詩以勞之

峽農生甚艱斫畚大山巔赤埴無土膏三刀財一田顧其穴居智占雨先燎原雨來亟下種不爾生不蕃  
麥穗黃剪剪豆苗綠芊芊餅餌了長夏更遲秋粟繁稅畝不什一遺棄得饜餐何曾識秔稻捫腹常果然  
我知吳農事請為峽農言吳田黑壤腴吳米玉粒鮮長腰瓠犀瘦齊頭珠顆圓紅蓮勝彫胡香子馥馥蘭  
或收虞舜餘或自占城傳早秬與晚穞爛炊甑甌間長腰米狹長亦名箭子齊頭白圓淨如珠紅蓮色微赤香子亦名九里香斗米入數合作飯蓮色微赤香子亦名九里香斗米入數合作飯  
芳香滿案舜王稻焦頭無須俗為瞽瞍燒種以與之占城種來自海南穞稔種禾價最賤以上皆吳中米品也雀鼠盜胥衆螟螣掠剩增釜區取贏折緡錢兩種致一斛未免催租癩重以私債迫逃屋無炊烟晶晶雲  
子飯生世不下咽食者定游手種者長流涎不如峽農飽豆麥終殘年

巫山縣

自此復登陸至夔門縣前掉石灘最險登岸以過舟謂之盤灘城樓對高唐門此去瞿塘不百里縣人以郭西流石堆為水信流石沒則灘

如馬矣

借馬巫山縣盤舟掉石灘梅肥朝雨細茶老暮烟寒門對高唐起江從灩澦難流堆三尺在旅夢一枝安

燕子坡

大山如牆缺小山如塚壘衆山直下看方知此峯危木末見夔峽一溝盡春泥中有天下嶮造化真兒嬉



峯頂不滿笑。舟中鬢成絲。登高尙超覽。況乃絕俗姿。

夔州竹枝歌九首

五月五日嵐氣開。南門競船爭看來。雲安酒濃麴米賤。家家扶得醉人迴。  
赤甲白鹽碧叢叢。半山人家草木風。榴花滿山紅似火。荔枝天涼未肯紅。  
新城果園連灩西。枇杷壓枝杏子肥。半青半黃朝出賣。日午買鹽沽酒歸。  
瘦婦趁墟城裏來。十五五市南街。行人莫笑女粗醜。兒郎自與買銀釵。  
白頭老媪簪紅花。黑頭女郎三髻丫。背上兒眠上山去。採桑已閒當採茶。  
百衲畚山青間紅。粟莖成穗豆成叢。東平屯田秔米軟。不到貧人飯甑中。  
白帝廟前無舊城。荒山野草古今情。只餘峽口一堆石。恰似人心未肯平。  
灩澦如樸瞿塘深。魚復陣圖江水心。大昌鹽船出巫峽。十日泝流無信音。  
當筵女兒歌竹枝。一聲三疊客忘歸。萬里江邊有船到。繡羅衣服生光輝。

雲安縣

春暮子規少。日斜紅鷓飛。兩山多布水。一鳥幾柴扉。蛭吐無窮壤。人行不斷磯。巴陽昨夜雨。灘上水先肥。  
杜子美詩云。涪萬無杜鵑。雲安詩云。終日子規啼。今萬州界固不聞杜鵑。而雲安已自少矣。又紅鷓飛時。滿背純赤。或云即黃鷓也。峽中蛭蚓之盛。無如雲安。江濱潰壤。戔戔無際。又

多大石岸。有一石長里許者。杜子美詩云。禹功多斷石。其實甚長。兩山間雨後瀑。泉數十百處。尤可觀。

萬州

晨炊維下巖。晚酌橫南浦。波心照州榜。雲腳響衙鼓。前山如屏牆。得得正當戶。西江朝宗來。循屏復東去。  
此萬州形勢也。惟親歷者當知此言之工。官曹倚巖棲。市井喚船渡。瓦屋仄石磴。猿啼鬧人語。剔核杏餘酸。連枝茶賸苦。窮鄉固瘠薄。陋俗亦寒窶。土人賣杏。皆先剔其核。取仁以爲藥也。土茶甚苦。不簡枝葉。雜菜煎之。營營謀食艱。寂寂懷甄訴。昔聞吏隱名。今識吏隱處。

峯門嶺遇雨泊梁山

窮鄉誰與話悲酸。駐馬看雲強自寬。酒力無端妨宿病。詩情不淺任塵官。虎狼地僻炊煙晚。風雨天低夏木寒。行盡峯門千萬丈。梁山鼓角報平安。

邛邛驛大雨

暮雨連朝雨。長亭又短亭。今朝騎馬怕。平日繫船聽。竹葉垂頭碧。秧苗滿意青。農疇方可望。客路敢違寧。

墊江縣

青泥沒髀僕頻驚。黃漲平橋馬不行。舊雨雲招新雨至。高田水入下田鳴。百年心事終懷土。一日身謀且望晴。休入中州爭米市。冥鴉同宿墊江城。

巾子山又雨

百日籃輿困跼踖。三晨汎坂兀躋攀。晚晴幸自墊江縣。今雨奈何巾子山。樹色于人殊漠漠。雲容憐我稍班班。如今只憶雪溪句。乘輿而來興盡還。

鄰山縣

山頂嘯雲黑似烟。修篁高柳共昏然。鳥啼一夜勸歸去。誰道東川無杜鵑。

沒水鋪晚晴。月出曉復大雨。上漏下溼。不堪其憂。

晚色熹微暖似薰。兒童歡喜走相聞。無端星月照溼土。依舊山川生雨雲。吳諶曰。星月照溼土。明朝

燃然。必復雨。占之每驗。旅枕夢寒涔屋漏。征衫朝潤冷鑪熏。快晴信是行人願。又恐田家暴背耘。

金山嶺

阪峻身頻偃。崖深首屢回。雲浮平地出。路拂半天來。但閱關山過。都忘歲月催。湘南初上馬。猶插早春梅。

明日至鄰水。又雨。

昨日方無雨。今朝又不晴。滿山皆履齒。隨處有泉聲。頗怪陰霖差。應催老病成。泥塗千騎士。與我共勞生。

望鄉臺

千山已盡一峯孤。立馬行人莫疾驅。從此蜀川平似掌。更無高處望東吳。

早晴發廣安軍晚宿萍池村莊

夜雨洗煩蒸。曉風薦清稔。雲頭墮鐵山。日腳迸金瀑。暑塗一日涼。遠客萬事足。羈人正奔波。觀者何陸續。翠蓋立嚴粧。青裙行跣足。俗陋介南徼。物華入東蜀。竹萌苦已青。蕢子酸猶綠。修蘆密成籬。直柏森似籬。泥乾馬蹄鬆。路坦亭堠速。暮投何人莊。窗戶暗修竹。

巴蜀人好食生蒜。臭不可近。頃在嶠南。其人好食檳榔。合蠣灰扶留藤。一名萋藤。食之輒昏然。已而醒快。三物合和唾如膿。血可厭。今來蜀道。又爲食蒜者所薰。戲題。

旅食諳殊俗。堆盤駭異聞。南灰滄薦蠣。巴饌菜先葷。幸脫萋藤醉。還遭葫蒜薰。絲蓴鄉味好。歸夢水連雲。

小溪縣

刈麥千平壠。橫槎一小溪。梓花紅綻碎。粟穗綠垂低。村婦猶多跣。山猿遂少啼。東州雖已過。錦里尙雲西。曉發飛鳥晨霞滿。天少頃大雨。吳諺云。朝霞不出門。暮霞行千里。驗之信然。戲紀其事。

朝霞不出門。暮霞行千里。今晨日未出。曉氣散如綺。心疑雨再作。眼轉雲四起。我豈知天道。吳農諺云。耳。古來占霧靄。說者類恢詭。飛雲走羣羊。停雲浴三豸。月當天畢宿。風自少女起。爛石燒成香。汗礎潤如洗。逐婦鳩能拙。穴居狸有智。蜂螭強知時。商羊與聞計。埵鳴東山鶴。堂審南柯蟻。或加陰石鞭。或議陽門閉。或云逢庚變。或自換甲始。刑鵝與象龍。聚訟非一理。不如老農諺。響應捷如鬼。哦詩敢夸博。聊用醒午睡。

九月十九日衙散回留火將及幕屬飲清心堂觀晚菊分韻

甲光射曾雲。雨腳不敢到。西山明古雪。秋日一竿照。先偏并絡密。後拒參旗掉。分弓滴博平。鳴劍伊吾小。君看天山箭。孤兔何足了。開邊吾豈敢。自治有餘巧。歸來翠帷卷。聊共黃花笑。雖無落帽風。亦復接籬倒。餘閒校筆陣。刻燭龍蛇掃。毛錐乃更剪。我亦鼓旗譟。

冬至日銅壺閣落成

走徧人間行路難。異鄉風物雜悲歡。三年北戶梅邊暖。萬里西樓雪外寒。已辦鬢霜供歲籥。仍拚髀肉了征鞍。故園雲物知何似。試上東樓且北看。

十二月十八日海雲賞山茶

追趁新晴管物華。馬蹄鬆快帽簷斜。天南臘盡風晞雪。冰下春來水漱沙。已報主林催市柳。仍從掌故問山茶。豐年自是驩聲沸。更著牙前畫鼓搗。

雨後東郭排岸司申梅開方及三分戲書小絕令一面開燕

雨入南枝玉蘂皴。合江雲冷凍芳塵。司花好事相邀勒。不著笙歌不肯春。

鞭春微雨

旛勝絲絲雨。笙歌步步塵。一年新樂事。萬里未歸人。雲薄竟慳雪。酒濃先受春。送寒東作近。慚愧耦耕身。

丙申元日交福寺禮塔

士女燃香挂幡以禳兵火之灾。

嶺梅蜀柳笑人忙。歲歲椒盤各異方。耳畔逢人無魯語。蜀人鄉音極難解。其爲京洛音。輒鬢邊隨我

是吳霜。新年後飲醪酥酒。故事先燃窰堵香。石笋新街好行樂。與民同處且逢場。

初四日東郊觀麥苗

去歲秋霖麥下遲。臘殘一雪潤無泥。相將飽喫滹沱飯。來聽林間快活啼。

櫻桃花

借暖衝寒不用媒。勻朱勻粉最先來。玉梅一見憐癡小。教向傍邊自在開。

再出東郊

晚景增年惜。官身作客諳。大都緣偶熟。豈是性能堪。昔者開三徑。它時老一龕。越溪親種竹。芸綠想毵毵。

上巳前一日學射山萬歲池故事

北郊征路記前迴。三尺驚塵馬踏開。新漲忽明多病眼。好風如把及時杯。青黃麥隴平平去。疎密楳林整整來。遊騎不知都幾許。長堤十里轉輕雷。

寶相花

誰把桑條夾砌栽。壓枝萬朵一時開。爲君也著詩收拾。題作西樓錦被堆。

四月十日出郊

約東南風徹曉忙。收雲捲雨一川涼。漲江混混無聲綠。熟麥騷騷有意黃。吏卒遠時聞信馬。田園佳處忽思鄉。鄰翁萬里應相念。春晚不歸同插秧。

曉詣三井觀

路轉市聲遠。寬閒古城東。適從紅塵來。忽入蒼煙叢。槿心傾濃露。芋葉翻微風。秋陽澹籬落。殘暑不必攻。野老熟睡起。口高首如蓬。官身騎官馬。君應笑龍鍾。

秋雨快晴。靜勝堂席上。

一笑憧憧雁鷺行。簿書堆裏賦秋陽。心如墜絮沾泥懶。身似飛泉激石忙。雨後蹲鴟先稻熟。霜前浮蟻鬪粳香。天涯節物遮愁眼。且復隨鄉便入鄉。

新涼夜坐

吏退焚香百慮空。靜聞蟲響度簾櫳。江頭一尺稻花雨。窗外三更蕉葉風。日日老添明鏡裏。家家涼入短檠中。簡編燈火平生事。雪白眇昏奈此翁。

秋老四境雨已沛然。晚坐籌邊樓。方議祈晴。樓下忽有東界農民數十人。訴山田卻要雨。須長

吏致禱感之作詩

歲晚羈懷有所思。秋來病骨最先知。鏡中公案已甘老。紙上課程休諱癡。西堰頗聞江漲急。東山猶說雨來遲。錦城樂事知多少。憂早憂霖蹙盡眉。

有懷石湖舊隱

浩蕩沙鷗久倦飛。摧頹櫪馬不勝韉。官中風月常虛度。夢裏關山或暫歸。橘社十年霜欲飽。鱸江一雨水應肥。冷雲著地塘蒲晚。誰爲披簑暖釣磯。

晚步宜華舊苑

喬木如山廢苑西。古溝疎水靜鳴池。吏兵窸窣番更後。樓閣崔嵬欲暝時。有露冷螢猶照草。無風驚雀自遷枝。歸來更了塵書債。目眊昏花獨穗垂。

西樓秋晚

樓前處處長秋苔。俛仰璿杓又欲回。殘暑已隨梁燕去。小春應爲海棠來。客愁天遠詩無託。吏案山橫睡有媒。晴日滿窗鳧鶩散。巴童來按鴨爐灰。

明日分弓亭按閱再用西樓韻

眼看白露點蒼苔。歲月飛流首屢回。老去讀書隨忘卻。醉中得句若飛來。聞雞午夜猶能舞。射雉西郊不



用媒自笑支離聊復爾。丹心元未十分灰。

丁酉重九藥市呈座客。

余於燕山首句云。萬里漢家使。桂林云萬里。漢都護。成都云萬里橋邊客。今歲倦游。賦此自戲。  
莫向登臨怨落暉。自緣羈宦阻歸期。年來厭把三邊酒。此去休哦萬里詩。烏帽不辭歌短髮。黃花終是欠  
東籬。若無合坐揮毫健。誰解西風楚客悲。

十一月十日海雲賞山茶。

門戶謹呼十里村。臘前風物已知春。兩年池上經行處。萬里天邊未去人。客鬢花身俱歲晚。粧光酒色且  
時新。海雲橋下溪如鏡。休把冠巾照路塵。

二月一十七日病後始能扶頭。

複幕重簾苦見遮。暮占棲雀曉占鴉。殘燈煮藥看成老。細雨鳴鳩過盡花。心爲早衰元自化。髮從無病已  
先華。更蒙厲鬼相提唱。此去山林屬當家。

病中聞西園新花已茂及竹筵皆成而海棠亦未過。

梅塢桃蹊斫竹初。三旬高臥信音疎。春雖與病無交涉。雨莫將花便破除。秣合蘧蘧隨夢去。何須咄咄向  
空書。頗聞蜀錦猶相待。去歲今朝已雪如。

枕上

一枕經春似宿醒。三衾投曉尚淒清。殘更未盡鴉先起。虛幌無聲鼠自驚。久病厭聞銅鼎沸。不眠惟望紙窗明。摧頽豈是功名具。燒藥爐邊過此生。

初履地

扶頭今日強冠簪。餘燼收從百戰酣。長脰閣軀如瘦鶴。衝風奪氣似枯柟。客來慵拄懶殘涕。老去寒同彌勒龜。何處更能容結習。任教花雨落毵毵。

病起初見賓僚時上疏丐詞未報

浪將冠服衣猿狙。因病偷閒稍自如。時有好懷誇得句。略無情語怕回書。邊城晏閉休傳箭。村巷春遊未荷鉏。追北良辰公事少。天恩儻許賦歸歟。

三月十九日極冷

誰勒餘寒不放廻。春深猶暖地爐灰。鄉心忽向燈前動。夜雨先從竹裏來。鷓鴣已如鶯百轉。醅釀那復雪千堆。調糜煮藥東風老。慚愧茶甌與酒杯。

入崇寧界

桑間三宿尙回頭。何況三年濯錦遊。草草陴筒中酒處。不知身已在彭州。

懷古亭

朝來寫得故人書。雙鯉難尋雁亦無。付與離堆江水去。解從陴縣到成都。

過青城題索橋

以竹繩爲之

織簾勾鋪面。排繩強架空。染人高曬帛。獵戶遠張罾。薄薄難承雨。翻翻不受風。何時將蜀客。東下看垂虹。

上清宮

歷井捫參興未闌。丹梯通處更躋攀。冥濛蜀道一雲氣。破碎岷山千髻鬟。但覺星辰垂地上。不知風雨滿人間。蝸牛兩角渾如夢。更說紛紛觸與蠻。

最高峰望雪山

大面峰頭六月寒。神燈收罷曉雲班。浮空忽湧三銀闕。云是西天雪嶺山。

青城縣何子方使君同年園池

橙塍芋隴意中行。浩蕩薰風不計程。雨腳背人歸玉壘。江聲隨馬入青城。五橋今日新知路。千佛當年舊綴名。水竹光中同一笑。丐君荷露濯塵纓。

次韻陸務觀編修新津遇雨不得登脩覺山徑過眉州三絕

脩覺一望可見劍門

送客多情難語離。僕夫無情車載脂。平生漂泊知何限。少似新津風雨時。  
離合紛紛怕遠遊。遠遊仍怕賦登樓。何須一望三千里。望盡西州轉更愁。  
雨後慕頤山色開。玻瓈江清已可盃。綠荷紅菱香四合。又入芙蓉城裏來。

次韻陸務觀慈姆巖別二絕

送我彌旬未忍回。可憐蕭索把離盃。不辭更宿中巖下。投老餘年豈再來。  
明朝真是送行人。從此關山隔故情。道義不磨雙鯉在。蜀江流水貫吳城。

玻瓈江一首戲效陸務觀作

玻瓈江頭春淥深。別時云云流到今。祗言日遠易排遣。不道相思翻苦心。烏頭可白我可去。菖花易青君易尋。人生若未免離別。不如碌碌無知音。

余與陸務觀自聖政所分袂。每別輒五年。離合又常以六月。似有數者。中巖送別至。揮淚失聲。

留此爲贈

宦塗流轉幾沉浮。雞黍何年共一丘。動輒五年遲遠信。常于三伏話羈愁。月生後夜天應老。淚落中巖水不流。一語相聞仍自解。除書聞已趣刀頭。

萬景樓

山谷來遊時未有此樓也

左披九頂雲。右送大峨眉。殘山賸水不知數。一一當樓供勝絕。玻瓈錦濯遙相通。指麾大渡來朝宗。川霧胥命各東去。我亦順流呼短篷。詩無傑語慙風物。賴有丹青傳小筆。仍添書客倚欄看。令與山川相映發。龍巒歸路遶烏尤。棟雲簾雨邀人留。若爲喚得涪翁起。題作西南第一樓。

問月堂附別

半明燈火話悲酸。此會情知後會難。四海宦遊多聚散。一生情事足愁歡。髻絲今夜不多黑。酒量徹明無數寬。醉夢登舟都不記。但聞風雨滿江寒。

別後寄題漢嘉月榭

同年陸務觀所作

隱吏詩情卜築幽。同年惜別勸淹留。試傾萬景湖亭酒。來看半輪江月秋。川路雖長猶共此。夜船空載且歸休。碧巖勝處頻回首。好事誰能更小樓。

峨眉縣

窮鄉未省識旌旄。雞犬驢呼巷陌騷。村媪聚觀行績布。野翁迎拜蹠然蒿。泉清土沃稻芒早。縣古林深槐

瘦高珍重里。儒來獻頌。盛言千載此丘遭。

初入大峨

煙霞沈痼不須醫。此去真同汗漫期。曾款上清臨大面。仍從太白問峨眉。山中緣法如今熟。世上功名自古癡。賸作畫圖歸挂壁。它年猶欲臥遊之。

八十四盤

冥鴻無伴鶴孤飛。回首塵籠一笑嬉。八十四盤新拄杖。萬千三乘舊牙旗。石梯碧滑雲生後。木葉紅斑雪霽時。說與同行莫惆悵。人間捷徑轉嶽巖。

婆羅平

仙聖飛行此是家。路逢真境但驚訝。神農嘗外盡靈藥。天女散餘多異花。嵐雨逼衣寒似鐵。冰泉炊米硬于沙。峰頭事事殊塵世。缺甃跳梁笑井蛙。

思佛亭曉望

栗烈剛風刮病眸。登臨何啻緩千憂。界天暑雪青城外。匝地晴雲瓦屋頭。浩蕩它年誇北客。蒼茫何處認西州。千巖萬壑須尋徧。身是江湖不繫舟。

韃爲江樓

河邊堵立看歸篷。三老開頭暮欲東。漲水稠灘連峽內。淺山浮石似湘中。無人驛路榛榛草。有客江樓浩浩風。種落塵稍少公事。賸裁新語寄詩筒。縣令能詩者

題譚德稱扇

蠻風吹雨瘴江肥。短草荒山鳥不飛。盡是瀘南腸斷句。如今分與故人歸。

題楊商卿扇

君歸我去兩銷魂。愁滿千山鎖瘴雲。後夜短檠風雨暗。誰能相伴細論文。

發合江數里寄楊商卿諸公

臨分滿意說離愁。草草無言祗淚流。船尾竹林遮縣市。故人猶自立沙頭。

過江津縣睡熟不暇梢船

西風扶艣似乘槎。水闊灘沉浪不花。夢裏竹間喧急雪。覺來船底衰鳴沙。

涪州江險不可泊入黔江橫舟

黃沙翻浪攻排亭。潰淖百尺呀成坑。坳窪眩轉久乃平。一渦熨帖千渦生。篙師絕叫歐川霧。鳴鏡飛渡如奔霆。水從岷來如濁涇。夜榜黔江聊濯纓。玻璃徹底鏡面平。忽思短棹中流橫。釣絲隨風浮月明。

妃子園

涪陵荔子天寶所貢。

露葉風枝驛騎傳。華清天上一嫣然。當時若識陳家紫。何處蠻村更有園。

下巖

疇昔中巖一夢殘。下巖風景亦高寒。峽中無處堪停棹。雨後今朝始凭欄。不用苦求毫相現。祇教長挂水簾看。山僧勸我題蒼壁。坡谷前頭未敢刊。

夔門卽事

夔水不可飲。取之臥龍十里之外。

峽行風物不堪論。伴暑驕陽雜瘴氛。人入恭南多附贅。山從夔子盡侵雲。竹枝舊曲元無調。麴米新筇但有聞。試覓清冷一杯水。筒泉須自臥龍分。

瞿唐行

七月十九日至夔子。濫頰徹髮不可犯。是夜水漲及山腹。詰旦視濫頰。則已在水中。土人云。此青草齊也。可以冒險而人。遂鼓棹略其頂而過。郡中遣候兵立山上。每一舟平安。則搖幟以召。後舟白鹽赤甲。皆峽口大山黃嵌黑石。皆峽中至險處。入峽西岸有聖泉。舟人或向之疾呼曰。人渴也。泉卽迸下。杯許。復乾。余舟過甚急。未之試也。



川瀾知我歸有程。一夜漲痕千丈生。中流擊楫洵作氣。夾峰旗鼓呀失聲。不知澹澨在船底。但覺瞿唐如鏡平。鑿峽疏川很石破。號山索飲飛泉驚。白鹽赤甲轉頭失。黑石黃嵌拚命輕。草齊增肥無泊處。竹枝凝葉空餘情。人間險路此奇絕。客裏驚心吾飽更。劍閣翻成蜀道易。請歌范子瞿唐行。

鄂州南樓

誰將玉笛弄中秋。黃鶴飛來識舊遊。漢樹有情橫北渚。蜀江無語抱南樓。燭天燈火三更市。搖月旌旗萬里舟。卻笑鱸江垂釣手。武昌魚好便淹留。

梅根夾

辛苦凌波棹。平安八夾船。月明漁浦網。風側瓦窰煙。老圃容挑菜。村巫橫索錢。且投人處宿。終夜得佳眠。將至吳中。親舊都來相迓。感懷有作。

望見家山意欲飛。古來燕晉一沾衣。回思客路豈非夢。乍聽鄉音真是歸。新事略從年少問。故人差覺坐中稀。不須更說桑榆暖。霜後鱸魚也自肥。

淳熙五年四月二日。直宿玉堂。懷舊二絕句。

桂海冰天老歲華。直廬重上玉皇家。當年曾識青青髻。惟有東牆一架花。雪山刁斗不停撾。夜把軍書敢顧家。珍重玉堂今夜夢。靜聞宮漏隔宮花。

初歸石湖

曉霧朝暎紺碧烘。橫塘西岸越城東。行人半出稻花上。宿鷺孤明菱葉中。信腳自能知舊路。驚心時復認鄰翁。當時手種斜橋柳。無限鳴蜩翠掃空。

贈舉書記歸雲山

一枕清風四十霜。孤生無處話淒涼。相看只有龐眉客。還在雲丘舊草堂。四股澗松霞斧碎。十圍巖桂燒痕枯。不知階下跳珠處。舊竹春來有笋無。青山面目想孤依。水石風林入夢思。白髮蒼顏心故在。只如當日看山時。

題查山林氏庵

庭戶清深宅翠微。雪如佳壁喚題詩。煙梢蟲蟲青圍屋。露葉鮮鮮綠滿籬。宿雨一春纔汎鴨。平蕪幾日已藏碑。山僧見客如枯木。疑是嬾殘南嶽師。

木瀆道中風雨震雷大作

惡風奔雲何壯哉。溪水欲立山欲摧。石岸迸裂纜邊樹。胡牀動搖船底雷。靈巖塔後雨腳挂。胥口廟前浪花來。篷漏衣沾不足惜。酒瓶傾側愁空罍。

光福塘上

指點炊烟隔莽蒼。午餐應可寄前莊。雞聲人語小家樂。木葉草花深巷香。春去已空衣尚絮。雨來何晚稻初芒。祇今農事村村急。第一先陂貯水塘。

秋前風雨頓涼

秋期如約不須摧。雨腳風聲兩快哉。但得暑光如寇退。不辭老景似潮來。酒杯觸撥詩情動。書卷招邀病眼開。明日更涼吾已卜。暮雲橫作亂峰堆。

曉起聞雨

老年稍喜睡魔清。兀坐枯株聽五更。蕭索輪囷憐燭燼。飛揚跋扈厭蚊聲。登高事了從教雨。刈熟人忙卻要晴。莫道西成便無慮。大須濃日曬香秔。

嘲蚊四十韻

暑魃方肆行。羽孽亦厲習。宵翹極么麼。塊北累闢翕。溼生同糞蝸。腐化類宵熠。初來鬧郭郭。少進巨原隰。嚶如蠅聲。聚若蠡羽。緝俄爲隱雷。閔逐作密霰。集口銜鋼鍼。鋒力洞衲衣。襲啾聲先計。議著肉便成。吸玄豹猶未定。卓錫已深入。血隨姑嘅升。勢甚轆轤汲。沉酣尻益高。飽滿腹漸急。晶晶紫蟹眼。滴滴紅飯粒。拂掠倦體煩。爬搔瘁肌澀。救東不虞西。擒一已竄十。新癩蓓蕾漲。宿暈斑爛浥。竟夜眠展轉。連牀歎於悒。云何人祇欣。乃繫汝張歛。驅以葵扇風。熏以艾烟溼。槩長鎮藏遮。帳隙亟補葺。火攻憚穢臭。手拍嫌腥汁。

伏翼佐掃除。網蛛助收拾。薄暮洵交攻。大明訂未戢。牛革厚逾氈。鬻介銛勝鋸。遭汝尙欲困。嗟人何以給。夏蟲雖衆多。罪狀相百什。蜂蠹豈房櫳。蟣蝨但禪褶。羊羶螳登俎。驥逸蝨附鬛。蠓惟舞醯瓮。蠹止崇書表。蚤爲鴝所撮。蠅亦虎能執。彼愆可貰死。汝罪當獻級。涼颯條然至。醜類殆哉岌。一吹觜吻破。再鼓翅翎繫。三千蹠頡利。百萬走尋邑。快哉六合內。蔑有一塵立。虛空旣清涼。家巷得寧輯。雞窗夜可誦。蛩機曉猶織。雨簾繡浪卷。風燭淚珠泣。客來添羽觴。人靜拂塵笈。恍還神明觀。似啓坯戶蟄。消長誰使然。智力詎能及。

晚步吳故城下

意行殊不計。榛菅風袖飄。然勝羽翰。拄杖前頭雙雉起。浮圖絕頂一鷗盤。醉紅匝地斜曛暖。熨練涵空漲水寒。卻向東皋望烟火。缺蟾先映樹林丹。

北山堂開爐來坐

困眠醒坐一龕多。竹洞無關斷客過。貪向爐中煨榾柮。嬾從掌上看菴摩。閒無雜念惟詩在。老不甘心奈鏡何。八萬四千安樂法。元無祕密可伽陀。

北城梅爲雪所厄

凍蘂黏枝瘦欲乾。新年猶未有春看。雪花祗欲欺紅紫。不道梅花也怕寒。

浙東舟中

處處槿樊圃。家家桃廡門。魚鹽臨水市。烟火隔江村。雨過張帆重。潮來汲井渾。彎跼短篷底。休說兩朱旛。  
東門外觀刈熟。民間租米船。相銜入城。喜作二絕。

菊莎杞棘爨無烟。日日文書橫索錢。今日甬東官況好。東津門外看租船。  
潮到靈橋綠繞船。海邊力穡屢豐年。澹青山色深黃稻。恰似胥門九月天。

重陽九經堂作

俗聞佳節自匆匆。老去愁秋又客中。青嶂卷簾三面月。黃花吹鬢幾絲風。十年故國新栽柳。萬里他鄉舊轉蓬。誰與安排今夜夢。片帆飛到小籬東。

大廳後堂南窗負暄

萬壑無聲海不波。一窗油紙暮春和。醉眠陡覺鬢飏。圍坐翻嫌楮枳多。水暖玉池添嗽嚙。花生銀海費揩摩。端如擁褐茅簷下。祗欠烏烏擊缶歌。

晚步北園

刮地晴颿退海痕。出門無扇可障塵。麥黏瘠土何時雪。梅糝疎林昨夜春。天鏡風烟疑夢事。髭霜時節尙官身。裹章束帶朝還暮。慚愧青鞋紫領巾。

春前十日作

臘淺猶餘十日春。官忙長愧百年身。雪摧未動詩無力。愁遣還來酒不神。節物何曾欺老病。書生自慣說悲辛。終朝戲促成何事。今古紛紛一窖塵。

懷歸寄題小艇

日出塵生萬劫忙。可憐虛費隙駒光。若教閒裏工夫到。始覺淡中滋味長。歲晚角巾思芋栗。年來手版愧耕桑。松風蘿月須相信。春水深時上野航。

元日

老來百味絮沾泥。期會關身尙火馳。幾夜鄉心欹枕處。今年腳力上樓時。酒缸幸有乾坤大。丹鼎何憂日月遲。莫道神仙無可學。學仙猶勝簿書癡。

體中不佳偶書

生平人比似維摩。試比庭屏不曾過。舊摘衰髯今雪徧。頻揩病眼轉花多。從來世味聊復爾。此去官身如老何。收拾頽齡加藥餌。尙堪風月對婆娑。

坐嘯齋書懷

老來窮苦事相違。兀坐鈴齋竟日癡。眼目昏緣多押字。胸襟俗爲少吟詩。月侵燈影吏方去。春遍梅梢官未知。直待食新方紱帶。明朝馬騎問陵陂。

致一齋述事

文書烟海困浮沉。不覺盤跚百病侵。隅問客年驚我老。忽聞鶯語歎春深。今朝麥粒黃堪麩。幾日秧田綠似針。除卻一犁春雨足。眼前無物可關心。

曉起信筆

午枕汗如洗。曉櫛氣稍蘇。莎蛩試風露。滿意鳴相呼。倦客感節物。流光不躊躇。秋聲已如許。殘暑何足驅。人言今歲熱。逾與常歲殊。此理恐未然。豈不知頭顱。年年有三伏。日日非故吾。婆娑今尙可。後當彌不如。病骨須一涼。未暇惜居諸。坐來有清思。西風搖井梧。

重九賞心亭登高

憶隨書劍此徘徊。投老雙旌重把杯。綠鬢風前無幾在。黃花雨後不多開。豐年江隴青黃徧。落日淮山紫翠來。飲罷此身猶是客。鄉心卻附晚潮回。

春晚

荒園蕭瑟懶追隨。舞燕啼鶯各自私。窗下日長多得睡。樽前花老不供詩。吾衰久矣雙蓬鬢。歸去來兮一釣絲。想見籬東春漲動。小舟無伴柳絲垂。

重九獨坐玉麟堂

江上西風動所思。又將清賞負東籬。年年客路黃花酒。日日鄉心白鴈詩。籠月秦淮無舊曲。馳烟鍾阜有新移。人生笑口真稀闊。況值官忙閱雨時。

公退書懷

昨者騰章奏發倉。今茲飛檄議驅蝗。四無告者僅一飽。七不堪中仍百忙。曠日自能臨俯仰。浮雲寧解制行藏。求田問舍亦何有。歲晚倦遊思故鄉。

癸卯除夜聊復爾齋偶題

五夜燈花重。東風角韻來。雪慳衣未續。春作句多梅。寂歷羅門亞。溫糜藥鼎煨。老嫌新歲換。病喜舊星回。鬱壘先題板。屠蘇後把杯。書扉無健筆。爆竹有寒灰。錫櫟牙難膠。椒盤眼倦開。陳人仍憊臥。身世兩悠哉。

甲辰人日病中吟六言六首以自嘲

攢眉輒作山字。啾耳惟聞水聲。人應見憐久病。我偏自厭餘生。目慌慌蟻旋磨。頭岑岑鼈負山。筆牀久已均伏。藥鼎何時丐閒。政爾榮枯衛溘。剛云人厄天窮。歸咎四衝臨歲。乞將九曜過宮。復吉旣愆七日。泰來惟俟三陽。曆日今頒寅正。占星更候農祥。有日猶嫌開牖。無風不敢下簾。報國丹心何似。夢中抵掌掀髯。



壯歲喜新節物。老來惜舊年華。病後都盧不問。家人時換瓶花。

上元紀吳下節物排諧體三十二韻

斗野豐年屢吳臺樂事并。酒壚先疊鼓。歲後即旗亭。先擊鼓。燈市蚤投瓊。臘月即有燈市。珍奇者數

采勝者。價喜膏油賤。祥占雨雪晴。貧簪仙子洞。坊巷燈。以連枝竹縛成。茵苔化人城。蓮花燈。橋炬疑龍

得燈。一舟人接竹危橋之表置。橋星訝鵲成。橋燈。小家龐獨踞。犬燈。高開鹿雙撐。鹿燈。屏展輝雲母。琉璃屏

垂晃水精。琉璃。萬窗花眼密。萬眼燈。以碎羅紅白相間。砌。千隙玉虹明。琉璃毬燈。每一隙映。舊菊

丹房桂。梔子。葡萄綠蔓縈。葡萄。方縑繙史冊。生絹糊方燈。村人喜看。圓魄綴門衡。月燈。擲燭騰空穩。小

時擲空。推毬袞地輕。大袞。映光魚隱見。琉璃壺瓶貯水養。轉影騎縱橫。馬騎。輕薄行歌過。顛狂社舞呈。民

鼓樂。謂之社火。不可悉。村田篋笠野。村田。街市管絃清。街市細。里巷分題句。每里門作花燈。官曹

別扁名。官府名額。多以。早船遙似泛。夾道陸行。為競渡之。水氈近如生。水戲照。鉗赭裝牢戶。獄燈。嘲

喧繪樂棚。山棚多畫一時。塔觀瑤席隘。喝道綺叢爭。禁鑰通三鼓。歸鞭任五更。桑蠶春繭勸。春繭自臘月

所以為蠶。花蝶夜蛾迎。大白蛾花。無貴賤也。悉。鳧子描丹筆。紅畫鴨子。鵝毛剪雪英。剪鵝毛為雪花。寶

糖珍粒粒。糖指。吳中謂之寶。烏膩美飴錫。俗言能去鳥膩。熬粉團變意。糰子。熬稔膈膊聲。炒糯穀

俗名李婁。北。筵簞巫志怪。香火婢輸誠。俗謂正月百草靈。故帶。帚卜拖裙驗。敝帚繫裙。箕詩落筆

驚即古紫姑。今謂之大仙。微如針屬尾以針姑卜伺其尾相屬爲兆。名針姑。賤及葦分莖葦莖分合爲卜。名葦姑。末俗難訶止。佳辰且放行。此時紛僕馬。有客靜柴荆。幸甚歸長缺。居然照短檠。生涯惟病骨。節物尙鄉情。拚撫成排體。咨詢逮里毗。誰修吳地志。聊以助譏評。

曉枕三首

養湯聽成萬籟。添被知是五更。陸續滿城鐘動。須臾後巷雞鳴。臥聞赤腳鼾息。樂哉栩栩蘊蘊。病夫心口相語。何日佳眠似渠。舒慘常隨天氣。關心窗暗窗明。日晏扶頭未起。喚人先問陰晴。

喜雨

昨遣長鬚借踏車。小池須水引鳴蛙。今朝一雨添新漲。便合翻泥種藕花。

風止

收盡狂飈卷盡雲。一竿晴日曉光新。柳魂花魄都無恙。依舊商量作好春。

重午

熨斗熏籠分夏衣。翁身獨比去年衰。已孤菖淥十分勸。卻要艾黃千壯醫。蜜粽冰糰爲誰好。丹符綵索聊自欺。小兒造物亦難料。藥裏有時生網絲。

積雨作寒五首

壓屋雨雲晝。暗環城。霖潦夏寒。西池半沒荷柄。南蕩平沈芡盤。  
已報舟浮登岸。更憐橋踏平池。養成蛙吹無謂。掃盡蚊雷卻奇。  
熨貼重尋毳衲。補苴盡護紙窗。餘生雪鬢禪榻。昨夢雲帆漲江。  
婢喜蚊僵霧帳。兒嘖蝸篆風樵。兀坐鼻端正白。忘懷眼底常青。  
山寒禪老不下泥。滑琴僧罕來。且喚園丁閒話。喜聞湖岸未頽。

題請息齋六言十首

洞門晝挂鐵鎖。閣道秋生綠苔。蒼下略同龜伏。瓜中且免蠅來。  
多謝紛紛雲雨。相忘渺渺江湖。坐隅但忌占鵲。屋上何煩譽烏。  
灑灑年年如馬。犬行日日摧車。笑中恐有義甫。泣裏難防叔魚。  
見影蛾猶鈇鉞。聞聲虺尙猜猜。問誰毛生名紙。知我角出車輪。  
不惜人扶難拜。非關我醉欲眠。勞君敬枯木耳。恐汝見濕灰焉。  
稅駕今吾將老。結廬此地不喧。恐妨蝴蝶同夢。笑倩顛當守門。  
口邊一任醜去。鼻孔慵將涕收。閑門冷落車轍。空室團欒話頭。

冷暖舊雨今雨。是非一波萬波。壁不禪枯達磨。室中病者維摩。親戚自有情話。來往都無雜言。酒熱竟須相報。文成聊與細論。園丁以時白事。山客終日相陪。竹比平安報到。花依次第折來。

富順楊商卿使君。曷與余相別于瀘之合江。渺然再會之期。後九年。乃訪余吳門。則喜可知也。今復分袂。更增惘然。病中強書數語送之。

合江縣下初語離。共說再會知何時。壽櫟堂前哄一笑。人生聚散真難料。青燈話舊語未終。船頭疊鼓帆爭風。草草相逢復相送。直恐送迎皆夢中。昨聞親上安邊奏。玉陛從容移禁漏。天香懷袖左魚符。歸作雙親千歲壽。我今老病塘蒲衰。君歸報政還復來。萬里倘容明月共。更期後夢如今夢。

初秋閒記園池草木五首

菟葵爛紫終陋。薔薇黃亦香。醫俗賸延竹色。療愁催折萱房。牛牽碧蔓自繞。鷄聳朱冠欲爭。菱葩可範伯雅。蓼節偏宜麴生。旱地蓮花嬌小。水盆梔子幽芳。微帳半年春豔。桂叢四季秋香。醉憐金盞齊側。臥看玉簪對橫。腥水留灌末莉。結香旋薰素馨。玉菌化生稚子。碧枝視現聲聞。馬齒任藏汞冷。鴻頭自勝硫溫。

巖桂三首

風簾疎爽月徘徊。悵望家人把酒杯。病著幽窗知幾日。瓶花兩見木犀開。  
越城芳徑手親栽。紅淺黃深次第開。不用小山招隱賦。身如強健日千迴。

一枝蕭索倚宣華。東苑香風屬內家。丹碧屠蘇銀燭照。平生奇絕象山花。

少城園中。惟一。特奇。

藻侄比課五言詩。已有趣。老懷甚喜。因吟病中十二首示之。可率昆季廣和。勝終日飽聞也。

舊歲連新歲。涼牀又暖牀。山川屏裏畫。時刻篆中香。畏壘安吾土。支離飽太倉。若教身更健。鶴背入維揚。  
認鹿紛紜夢。亡羊散亂心。眇昏遮眼讀。愁苦撚髭吟。幸覺行迷遠。其如臥病深。通身都放下。何用覓砭針。  
日暖衣猶襲。宵長被有稜。朝晡三牒飯。昏曉一缸燈。伴坐跬如几。扶行瘦比藤。生緣堪入畫。寂寞憩松僧。  
繩椅扶枵骨。蒲團閣悴膚。事疑償業債。形類窘囚拘。空劫真常體。浮生幻化軀。箇中元不二。無語對文殊。  
軟熟羞盤饌。芳辛實枕幃。候晴先晒席。占濕預烘衣。易粟鷄皮皺。難培鶴骨肥。頭顱雖若此。虛白自生輝。  
數息增晨清。伸眉愜晚晴。隙塵浮日影。窗穴嘯風聲。捫蝨天機動。驅蚊我相生。偶然成一笑。栩栩暫身輕。  
貴仕龜鑽筴。閑居馬脫鞵。冠塵昏舊製。帶眼剩新圍。堆案書郵少。登門刺字稀。拵關灰木坐。休示季咸機。  
目眊浮珠珮。聲塵籟玉簫。秋懷潘鬢禿。午夢楚魂銷。注水瓶花醒。吹薪鼎藥潮。南柯何處是。斜日上廊腰。  
靜裏秋先到。閒中晝自長。門闌終泄柳。尸祝漫庚桑。腹已枵經笥。身猶試藥方。強名今日愈。勃率負東牆。

汗漬筇枝赤。苔封屐齒青。有醫延上坐。無客抗分庭。霽月鑽窗看。鳴禽側枕聽。莫噴猿鶴怨。岫幌兩年扃。  
視絮勞羣從。祇承愧闔家。乳泉供水遞。金液養丹芽。嘉釀厚如酪。旋春香勝花。百端扶老億。無物報投瓜。  
學業荒呻畢。歡悰隔笑鹽。人秋先複幕。過夏亦疎簾。門客嗔愁思。家人獻吉占。尤憐小兒女。時報鷓鴣鴛。

灼艾

血忌詳涓日。尻神謹避方。艾求真伏道。穴按古明堂。謝去羣巫祝。勝如幾藥湯。起來成獨笑。一病攪千忙。

白髭行

四十踰四髭始蓄。手持漢節臨大荒。輿疾歸來皮骨在。兩鬢尙作青絲光。俯仰行年四十九。萬里南馳復西走。班班頷下點吳霜。猶可斐夷誑賓友。屈指如今又十年。兩年憊臥秋風前。人生血氣能幾許。不待覽鏡知皤然。長安後輩輕前輩。百方染藥千金賣。煩攔包裹夜不眠。無奈露頭出光怪。病翁高臥門長扃。垂雪毵毵骨更青。兒童不作居士喚。喚作堂中老壽星。

甲辰除夜吟

一年三百六十日。日日三椽臥衰疾。傍人挪揄還嘆咨。問我如何度四時。我言平生老行李。蓐食趨程中夜起。當時想像閉門閑。弱水茗茗三萬里。如今因病得疎慵。腳底關山如夢中。重簾複幕白晝靜。戶外車馬從西東。若問四時何以度。念定更無新與故。瓶花開落紀春冬。窗紙昏明認朝暮。行年六十是明朝。不

暇自憐聊自嘲。婪尾三杯餽一櫟。從今身健齒牙牢。

元夕二首

藥爐湯鼎煮孤燈。禪版蒲團老病僧。兒女強修元夕供。玉蛾先避雪鬢鬢。  
落梅穠李趁時新。枯木崖邊一任春。尚愛鄉音醒病耳。隔牆時有賣餚人。

請息齋書事三首

覆雨翻雲轉手成。紛紛輕薄可憐生。天無寒暑無時令。人不炎涼不世情。栩栩算來俱蝶夢。啾啾能有幾  
雞鳴。冰山側畔紅塵漲。不隔瑤臺月露清。

刻木牽絲罷戲場。祭終雨後兩相忘。門雖有雀尚廷尉。食已無魚休孟嘗。蝨裏趨時真是賊。虎中宣力任  
爲佞。籬東舍北誰情話。雞語鷗盟意卻長。  
聚蚋醯邊鬧似雷。乞兒爭背向寒灰。長平失勢見何晚。栗里息交歸去來。休問江湖魚有沫。但靳雲水鶴  
無媒。巖扉岫幌牢扃鑰。不是漁樵不與開。

送文季高倅興元

素衣京洛恨成縑。青鬢吳江喜未絲。燭暗不眠談舊事。酒闌作惡問行期。留書情話須親戚。風雨殘春更  
別離。屈指歸來重一笑。掃除門巷著旌麾。

家人子輩往石湖檢校暮歸

南浦回春棹。東城揜暮扉。兒修雞柵了。女挈菜籃歸。風力雖欺酒。花香尙染衣。衰翁牢守舍。腸斷釣魚磯。

次韻龔養正中秋無月三首

詞客暮天清露下。老翁臥病破窗中。高吟大醉輸公等。不見嫦娥與我同。去年怪雨無端甚。今歲癡雲亦復然。減卻新詩酸卻酒。乘除添得一更眠。丙夜清光些子見。兒童驚喜強雄夸。闌珊高興應無幾。恰似春殘看落花。

殊不惡齋春晚閒吟五絕

西風入簾圖畫響。斜照穿隙網絲明。簷間雙雀有時鬪。壁下一蛩終日鳴。旁若無人鼠飲硯。磨之不去蠅登盤。天涼睡起枕痕暖。日晚慵來香字寒。就食遷居蟻墳壤。隨風作舍蛛裊絲。百年何處用三窟。萬事信緣安一枝。市聲洶洶鼓摧陣。日影駸駸潮漲痕。消磨意氣默數息。把玩光陰牢閉門。中秋昨已等閑過。重九今還如夢來。霜髻數莖羞墮幘。黃花三度笑空杯。

丙午新正書懷十首

不用桃符貼畫雞。身心安處是天倪。行年六十舊曆日。汗腳尺三新杖藜。祝我賸周花甲子。謝人深勸玉



東西春風若借筋骸使。先渡南村學灌畦。

瘦骨難勝過節衣。日高催起趁農炊。病憐柳栗隨身慣。老覺屠蘇到手遲。一飽但斬庚癸諾。百年甘守甲辰雌。莫言此外都無事。柳眼梅梢正索詩。

煮茗燒香了歲時。靜中光景笑中嬉。身閒一日似兩日。春淺南枝如北枝。朝鏡略無功業到。午窗惟有睡魔知。年來併束牀頭易。一任平章濟叔癡。

窮巷閒門本闕然。強將爆竹聒階前。人情舊雨非今雨。老境增年是減年。口不兩匙休足穀。生能幾履莫言錢。掃除一室空諸有。龐老家。人總解禪。吳諺云。一口不能著兩匙。

厲風翻海雪漫天。百計逃寒息萬緣。穩作披爐如臥炕。厚裁綿旋勝披氈。尊前見在嘗騰醉。飯後無何爛熯眠。斟酌出門高興盡。從教閒卻剌溪船。披爐綿旋。皆新得法。

俗情如絮已泥沾。因病偷閒意屬厭。鵬鷗相安無可笑。熊魚自古不容兼。灰埋櫓楫多時暖。雪壓萸菁滿意甜。溫飽閉門吾事辦。異時書判指如籤。

炭熟香濃石鼎煨。人言小閣是春臺。蕉心翠展一冬在。梅蕊粉融連夜開。肅肅九冰妨發育。溫溫三火護恢台。養生此外無遺說。梨棗元須趁暖栽。水芭蕉。經冬不瘁。

經過掃軌但幽栖。巢穩林深寄一枝。栗里歸來窗下臥。香山老去病中詩。東風馬耳塵勞後。半夜雞聲睡

熟時俛仰平生盡陳迹。恰如臚膊幾枰棋。

窗明窗暗篆烟排。珍重晨光與夕暉。東院齋鐘披被坐。南城嚴鼓岸巾歸。幾人霜滑騎朝馬。何處燈殘織曉機。懶裏若承三昧力。始知忙裏事俱非。敝早眠晏起。

殊方節物記吾曾。海北天西一瘦藤。烏攬雞檳嘗老酒。酥花芋葉試新橙。瘴雲度嶺濃如墨。邊雲窺窗冷欲冰。閒展兩鄉圖畫看。臥遊何必減深燈。此篇記桂林成都元日勝事。檳榔皆做盤中物。老酒十數年不壞者。

丙午新年六十一歲。俗謂之元命。作詩自貶。

歲復當生次。星臨本命辰。四人同丙午。初度再庚寅。長狄名猶記。沙隨會若新。童心仍竹馬。暮境忽蒲輪。鏡裏全成老。尊前略似春。三年歸汶上。千日臥漳濱。剛長交新泰。陰消脫舊屯。網蛛縈藥裏。寶犬吠醫人。窗下烏皮几。田間紫領巾。鯢淵方止水。鯤海任揚塵。波匿觀河見。維摩示病身。鬢端還一笑。默識幼中真。  
文潞公詩云。四人二百四十歲。況是同生丙午年。僕用此事也。

春來風雨無一日好晴。因賦瓶花二絕。

滿插瓶花罷出遊。莫將攀折爲花愁。不知燭照香薰看。何似風吹雨打休。酒冷花寒無好懷。柴荆終日爲誰開。三分春色三分雨。正似東風本不來。

春晚卽事留游子明正仲顯。

繡地紅千點。平橋綠一篙。棟花來石首。穀雨熟櫻桃。笑我生糜飯。慙君有意袍。故人能少駐。門徑久蓬蒿。

梅雨五絕

梅雨暫收斜照明。去年無此一日晴。忽思城東黃篾舫。臥聽打鼓踏車聲。  
己酉甲申雷雨驚。乘除卻賀芒種晴。插秧先插早秈稻。小忍數旬蒸米成。  
風聲不多雨聲多。洶洶曉衾聞浪波。恰似秋眠隱靜寺。玉霄泉從牀下過。  
千山雲深甲子雨。十日地溼東南風。靜裏壺天人不到。火輪飛出默存中。  
雨霽雲閒池面光。三年魚苗如許長。小荷拳拳可包鮓。晚日照盤風露香。

次韻李永見訪二首

混俗休超俗。居家似出家。有爲皆影事。無念卽生涯。莫覓安心法。翻成捏目花。作糜須穀粟。千劫漫炊砂。  
有意能停棹。多情易憶家。清詩穿月脇。遠夢繞天涯。雨蝶衣濡粉。秋蚊喙吐花。新涼宜小駐。談笑有丹砂。

自詠瘦悴

皮下無多肉。老來瘦不禁。骨稜春焙銹。筋蹙海山沈。蟣蝨從何有。蚊蠅枉見侵。惟餘老筇杖。相伴兩虛心。

四時田園雜興六十首并引

淳熙丙午。沉疴少紓。復至石湖舊隱。野外卽事。輒書一絕。終歲得六十首。號四時田園雜興。

柳花深巷午雞聲。桑葉尖新綠未成。坐睡覺來無一事。滿窗晴日看蠶生。  
土膏欲動雨頻催。萬草千花一餉開。舍後荒畦猶綠秀。鄰家鞭笞過牆來。  
高田二麥接山青。傍水低田綠未耕。桃杏滿村春似錦。踏歌椎鼓過清明。  
老盆新熟杜茅柴。攜向田頭祭社來。巫媪莫嫌滋味薄。旗亭官酒更多灰。  
社下燒錢鼓似雷。日斜扶得醉翁回。青枝滿地花狼籍。知是兒孫鬪草來。  
騎吹東西里巷喧。行春車馬鬧如煙。繫牛莫礙門前路。移繫門西碌碡邊。  
寒食花枝插滿頭。舊裙青袂幾扁舟。一年一度游山寺。不上靈巖卽虎丘。  
郭裏人家拜掃回。新開醪酒薦青梅。日長路好城門近。借我茅亭暖一杯。  
步屨尋春有好懷。雨餘蹄道水如杯。隨人黃犬攬前去。走到溪橋忽自迴。  
種園得果墮償勞。不奈兒童鳥雀搔。已插棘針樊笱徑。更鋪漁網蓋櫻桃。  
吉日初開種稻包。南山雷動雨連宵。今年不欠秧田水。新漲看看拍小橋。  
桑下春蔬綠滿畦。蕊心青嫩芥臺肥。溪頭洗擇店頭賣。日暮褰鹽沽酒歸。

右春日田園雜興十二絕

紫青蓴葉卷荷香。玉雪芹芽拔薤長。自擷溪毛充晚供。短篷風雨宿橫塘。

湖蓮舊蕩藕新翻。小小荷錢沒漲痕。斟酌梅天風浪緊。更從水外種蘆根。  
蝴蝶雙雙入菜花。日長無客到田家。雞飛過籬犬吠竇。知有行商來賣茶。  
浦裙水滿葦蘋洲。上已微寒嬾出游。薄暮蛙聲連曉鬧。今年田稻十分秋。上已蛙鳴無水。  
新綠園林曉氣涼。晨炊早出看移秧。百花飄盡桑麻小。夾路風來阿魏香。  
三旬蠶忌閉門中。鄰曲都無步往蹤。猶是曉晴風露下。采桑時節暫相逢。  
汙萊一稜水周圍。歲歲蝸廬沒半扉。不看菱青難護岸。小舟撐取葑田歸。  
茅針香軟漸包茸。蓬櫺甘酸半染紅。采采歸來兒女笑。杖頭高掛小筠籠。  
穀雨如絲復似塵。煮瓶浮蠟正嘗新。牡丹破萼櫻桃熟。未許飛花減卻春。  
雨後山家起較遲。天窗新色半熹微。老翁欹枕聽鶯囀。童子開門放燕飛。  
海雨江風浪作堆。時新魚菜逐春回。荻芽抽筍河魴上。棟子開花石首來。  
烏鳥投林過客稀。前山煙暝到柴扉。小童一棹舟如葉。獨自編欄鴨陣歸。

右晚春田園雜興十二絕

梅子金黃杏子肥。麥花雪白菜花稀。日長籬落無人過。惟有蜻蜓蛺蝶飛。  
五月吳江麥秀寒。移秧披絮尙衣單。稻根科斗行如塊。田水今年一尺寬。

二麥俱收斗百錢。田家喚作小豐年。餅爐飯甑無飢色。接到西風熟稻天。  
百沸繰湯雪湧波。繰車嘈噴雨鳴囊。桑姑盆手交相賀。綿繭無多線繭多。  
小婦連宵上絹機。大耆催稅急于飛。今年幸甚蠶桑熟。留得黃絲織夏衣。  
下田戽水出江流。高壠翻江逆上溝。地勢不齊人力盡。丁男長在踏車頭。  
書出耘田夜績麻。村莊兒女各當家。兒童未解供耕織。也傍桑陰學種瓜。  
槐葉初勻日氣涼。葱葱鼠耳翠成雙。三公只得三株看。閒客清陰滿北窗。  
黃塵行客汗如漿。少住儂家嗽井香。借與門前盤石坐。柳陰亭午正風涼。  
千頃芙蕖放棹嬉。花深迷路晚忘歸。家人暗識船行處。時有驚忙小鴨飛。  
采菱辛苦廢犁鉏。血指流丹鬼質枯。無力買田聊種水。近來湖面亦收租。  
蝸蟻千萬沸斜陽。蛙黽無邊聒夜長。不把癡聾相對治。夢魂爭得到藜牀。

右夏日田園雜興十二絕

杞菊垂珠滴露紅。雨蛩相應語莎叢。蟲絲罥盡黃葵葉。寂歷高花側晚風。  
朱門乞巧沸歡聲。田舍黃昏靜掩扃。男解牽牛女能織。不須邀福渡河星。  
橘蠹如蠶入化機。枝間垂繭似蓑衣。忽然蛻作多花蝶。翅粉纔乾便學飛。

靜看簷蛛結網低。無端妨礙小蟲飛。蜻蜓倒挂蜂兒窠。催喚山童爲解圍。  
垂成穉事苦艱難。忘雨嫌風更怯寒。牋訴天公休掠剩。半償私債半輸官。  
秋來只怕雨垂垂。甲子無雲萬事宜。穫稻畢工隨曬穀。直須晴到入倉時。  
中秋晴景屬潛夫。棹人空明看太湖。身外水天銀一色。城中有此月明無。  
新築場泥鏡面平。家家打稻趁霜晴。笑歌聲裏輕雷動。一夜連枷響到明。  
租船滿載候開倉。粒粒如珠白似霜。不惜兩鍾輸一斛。尙贏糠覈飽兒郎。  
菽粟瓶罍貯滿家。天教將醉作生涯。不知新滴堪未斲。今歲重陽有菊花。  
細擣棖螯有鱸魚。西風吹上四腮鱸。雪鬆酥膩千絲縷。除卻松江到處無。  
新霜徹曉報秋深。染盡青林作緜林。惟有橘園風景異。碧叢叢裏萬黃金。

右秋日田園雜興十二絕

斜日低山片月高。睡餘行藥繞江郊。霜風掃盡千林葉。閒倚筇枝數鶴巢。  
炙背簷前日似烘。暖醺醺後困蒙蒙。過門走馬何官職。側帽籠鞭戰北風。  
屋上添高一把茅。密泥房壁似僧寮。從教屋外陰風吼。臥聽籬頭響玉簫。  
松節燃膏當燭鎰。凝煙如墨暗房櫺。曉來拭淨南牕紙。便覺斜陽一倍紅。

乾高寅缺築牛宮。卮酒豚蹄酹土公。牯犍無瘟犢兒長。明年添種越城東。  
放船開看雪山晴。風定奇寒晚更凝。坐聽一篙珠玉碎。不知湖面已成冰。  
撥雪挑來踏地菘。味如蜜藕更肥醲。朱門肉食無風味。只作尋常菜把供。  
槽榼無煙雪夜長。地爐煨酒暖如湯。莫嗔老婦無盤飣。笑指灰中芋栗香。  
煮酒春前臘後蒸。一年長饗甕頭清。塵居何似山居樂。秫米新來禁入城。  
黃紙蠲租白紙催。皂衣旁午下鄉來。長官頭腦冬烘甚。乞汝青銅買酒廻。  
探梅公子款柴門。枝北枝南總未春。忽見小桃紅似錦。卻疑儂似武陵人。  
村巷多年見俗情。鄰翁講禮拜柴荆。長衫布縷如霜雪。云是家機自織成。

右冬日田園雜興十二絕

自晨至午起居飲食皆以牆外人物之聲爲節。戲書四絕。

巷南敲板報殘更。街北彈絲行誦經。已被兩人驚夢斷。誰家風鶴鬪鳴鈴。  
菜市喧時窗透明。餅師叫後藥煎成。閒居日出都無事。惟有開門掃地聲。  
北砦教回搗鼓遠。東禪飯熟打鐘頻。小童三喚先生起。日滿東窗暖似春。  
起傍東窗手把書。華顛種種不經梳。朝餐欲倒須巾裏。已有重來晚市魚。



閨門初泛二十四韻

新修小舫。因病禳祓。屯滯遂至北城。迺邈到楓橋。一路而還。

好在馳煙路。平生載酒行。摧藏身久病。契闊歲頻更。昨夜燈花曉。今朝稻把晴。出門新夢境。觸目舊詩情。水遠推篷眩。天寬倚柁驚。轉彎添繚挽。罨岸併篙撐。舫後裝兒女。艫前酌弟兄。醅香新麴嫩。茗味小春輕。紅皺分霜果。黃鶯撚夕英。纈林疎露屋。朱閣靜臨城。桃塢論今昔。楓橋管送迎。山腰樵擔動。木末酒旗明。竟日窳煙直。中流塔影橫。數帆殘照滿。一笛暮江平。曬網楓邊桁。牽罾柳際棚。岫雲縈石住。田水穴堤鳴。過渡牛歸速。穿籬犬吠獾。魚寒猶作陣。雁遠更聞聲。急櫂潮痕出。疎鐘暝色生。鄰翁欣問訊。逋客愧寒盟。一昨成歸臥。于今負耦耕。生涯都塌颯。心曲漫崢嶸。猿鶴休多怨。菰蓴尚可羹。藥囊吾厭苦。扶僮且班荆。

重陽後菊花二首

寂寞東籬溼露華。依前金盞照泥沙。世情兒女無高韻。只看重陽一日花。過了登高菊尙新。酒徒詩客斷知聞。恰如退士垂車後。勢利交親不到門。

丁未春日瓶中梅殊未開二首

煖閣無人到。寒枝爲我橫。情鍾吹鍾破。靜極覺香生。老去魂休斷。春來眼且明。逃禪時索笑。百匝傍窗行。夜雪臘前凍。朝陽春後蘇。人憐疎蘂瘦。花笑病翁臞。露白能多少。尋春似有無。詩催全不力。煮水換銅壺。

題夫差廟

縱敵稽山禍已胎。垂涎上國更荒哉。不知養虎自遺患。只道求魚無後災。夢見梧桐生後圃。眼看麋鹿上高臺。千齡只有忠臣恨。化作濤江雪浪堆。

翻韞菴夜坐聞雨

閉門冷落靜無譁。小閣簾幃密自遮。日晚課程丹竈火。夜深光景佛燈花。人生寧有病連歲。身世略如僧在家。步履尋春非老伴。任教風雨喚雷車。

睡起

悠悠與世共兒嬉。兀兀從人笑我癡。閒裏事忙晴曬藥。靜中機動夜爭棋。心情書卷無佳句。時節梅花有好枝。熟睡覺來何所欠。氈根香軟飯流匙。

賞海棠二絕

芳春隨分到貧家。兒女多情惜歲華。聊爲海棠修故事。去年燈燭去年花。憶向宣華夜倚欄。花光妍暖月光寒。如今塌颯嫌風露。且只銅瓶滿插看。

午窗遣興家人謀過石湖

雲日初收破柱雷。小窗坐穩興悠哉。熏爐花氣朝醒解。茶鼎松風午夢迴。謝客門闌風動竹。惜春時節雨

肥梅畫船破浪亦一快。聞道湖光如撥醅。

將至石湖道中書事

水綠鷗邊漲。天青雁外晴。柳堤隨草遠。麥隴帶桑平。白道吳新郭。蒼煙越故城。稍聞鷄犬鬧。僮僕想來迎。

三月十六日石湖書事三首

春事日以闌。暑陰正清美。拖筇入林下。秀綠照衣袂。盧橘梅子黃。櫻桃桑棋紫。荷依浪花顫。筍破苔色起。風日收宿陰。物色有新意。鄰曲知我歸。爭來問何似。病腦今有無。加飯日能幾。掀髯謝父老。衰雪已如此。種木二十年。手開南野荒。苒苒新歲月。依依舊林塘。汗萊擅下溼。苓蔚驕衆芳。菱母尙能瘦。竹孫如許長。憶初學圃時。刀笠冒風霜。今茲百不堪。裹帽人扶將。龍鍾數能來。猶勝兩相忘。

湖光明可鑒。山色淨如沐。閒心愜舊觀。愁眼快奇矚。依然北窗下。凝塵滿香簾。訪我烏皮几。拂我青氍褥。荒哉賦遠游。幸甚遂初服。老紅餞餘春。衆綠自幽馥。好風吹晚晴。斜照入疎竹。兀坐胎息勻。不覺清夢熟。

送遂寧何道士自潭湘歸蜀

書劍飄然席未溫。火雲撲地暑煙昏。山黃水濁湖南路。竹月荷風憶范村。

再遊天平有懷舊事且得卓菴之處呈壽老

訪舊光陰二十年。殘僧相對兩依然。木蘭已老無花發。石竹依前有麝眠。萬戶直須龜手藥。一龜何用買

山錢從今半座須分我，共說昏昏一覺禪。

晚登木瀆小樓

萬象當樓繡繡張，欄干一士立蒼茫。雲堆不動山深碧，星出無多月淡黃。宿鳥盡時猶數點，歸鴻驚處更斜行。松陵政有鱸魚上，安得長竿坐釣航。

題米元暉吳興山水橫卷

道場山麓接何山，影落蒼溪浸碧瀾。只欠荷花三十里，檣頭船上把漁竿。

素羹

氈芋凝酥敵少城，土箸割玉勝南京。合和二物歸藜糝，新法儂家骨董羹。

除夜地爐書事

節物閒門裏，人情老境中。雁聲凌急雨，燈影戰斜風。糟醕新醅白，紫錐軟火紅。家人愜夜話，我已困蒙茸。

浮醅謂之撒醕

次韻虞子建見哈贖帶作醕

齋詞難著野衣冠，旋贖金章始見閒。臺架塵侵毬路暗，花書墨漬笏頭斑。當年驛騎傳呼賜，此日村童拂拭還。若比前廳荒驛舍，見存猶可一開顏。

兒女傳觀省見稀。病身聊復借光輝。莫嫌憔悴沈腰瘦。且喜間關秦壁歸。不是典來還酒債。亦非將去換  
蓑衣。塵魚甑釜時相阨。微汝誰能爲解圍。

顏橋道中

村村籬落總新修。處處田疇盡有秋。一段農家好風景。稻堆高出屋山頭。

書事三絕

爨婢請淘酒米。園丁催算花錢。如許日生公事。誰云窮巷蕭然。  
日日處方候脈。時時推策禳災。門外誰無車轍。醫生卜叟猶來。  
簡子約同湖棹。周郎許過田廬。碧雲日暮空合。多病故人遂疎。

親鄰招集強往便歸

樂天漸老欲謀歡。大似蒸砂不作團。已覺笙歌無暖熱。仍嫌風月太清寒。氣衰況復三而竭。心賞猶于四  
者難。卻恐人嫌情太薄。聊將花作霧中看。

雪意方濃復作雨

擬看飛花陣。翻成建水聲。雨吾寧不識。雪汝幾時成。三白從今卜。千倉待此盈。黃雲如有意。青女莫無情。

春朝早起

莫笑眠常早，還憐起不遲。穠香溫夜氣，小雨溼春姿。瘦比中年甚，寒惟病骨知。羨渠兒女健，繞屋探南枝。

詠懷自嘲

簾溜春猶凍，門扉晚未開。退閑驚客至，衰懶怕書來。日日教澆竹，朝朝遣探梅。園丁應竊笑，猶自說心灰。

早衰

早衰頭腦已冬烘，信拙心情似苦空。僚舊姓名多健忘，家人長短總佯聾。一窗暖日棋聲裏，四壁寒燈藥氣中。晚景只消如此過，不堪拈出教兒童。

習閒

習閒成懶懶成癡，六用都藏縮似龜。雪已許多猶不飲，梅今如此尙無詩。閒看貓暖眠氈褥，靜聽鶉寒叫竹籬。寂寞無人同此意，時時惟有睡魔知。

陰寒終日兀坐

東風微解綴簷冰，仍喜朝來井水清。臘淺得春全未暖，雪慳和雨最難晴。小窗日暖猶棋局，窮巷更深尙屐聲。莫把摧頽嫌暮景，且將閒散替勞生。

親戚小集

避溼違寒不出門，一冬未省正冠巾。月從雪後皆奇夜，天向梅邊有別春。秉燭登臨空話舊，擁爐情味莫

懷新榮華勢利輸人慣。贏得尊前現在身。

睡覺

尋思斷夢半膏騰。漸見天窗紙瓦明。宿鳥噪羣穿竹去。縣前猶自打殘更。

臘月村田樂府十首并引

余歸石湖。往來田家。得歲暮十事。採其語各賦一詩。以識土風。號村田樂府。其一冬春行。臘日春米。爲一歲計。多聚杵臼。盡臘中畢事。藏之土瓦倉中。經年不壞。謂之冬春米。其二燈市行。風俗尤競上元。一月前已賣燈。謂之燈市。價貴者數人聚博。勝則得之。喧盛不減燈市。其三祭竈詞。臘月二十四夜。祀竈。其說謂竈神異日朝天。白一歲事。故前期禱之。其四口數粥行。二十五日。煮赤豆作糜。暮夜闔家同饗。云能解瘟氣。雖遠出未歸者。亦留貯口。分至襁褓小兒。及僮僕皆預。故名口數粥。豆粥。本正月望日祭門故事。流傳爲此。其五爆竹行。此它郡所同。而吳中特盛。惡鬼蓋畏此聲。古以歲朝而吳以二十五夜。其六燒火盆行。爆竹之夕。人家各又于門首燃薪滿盆。無貧富皆爾。謂之相暖熱。其七照田蠶詞。與燒火盆同日。村落則以禿帚若麻。蘸竹枝。輩燃火炬。縛長竿之杪。以照田。爛然徧野。以祈絲穀。其八分歲詞。除夜祭其先。竣事。長幼聚飲。祝頌而散。謂之分歲。其九賣癡獸詞。分歲罷。小兒繞街呼叫云。賣汝癡。賣汝獸。世傳吳人多獸。故兒輩諱之。欲賈其餘。益可笑。其十打灰堆詞。除夜將曉。雞且鳴。婢獲持杖。擊

糞壤致詞以祈利市謂之打灰堆此本彭蠡清洪君廟中打如願故事惟吳下至今不廢云

冬春行

臘中儲蓄百事利第一先春年計米羣呼步碓滿門庭運杵成風雷動地篩勻箕健無糶糠百斛只費三日忙齊頭圓潔箭子長隔籬輝日雪生光土倉瓦甕分蓋藏不蠹不腐常新香去年薄收飯不足今年頓頓炊白玉春耕有種夏有糧接到明年秋刈熟鄰叟來觀還歎嗟貧人一飯不可賒官租私債紛如麻有米冬春能幾家

燈市行

吳臺今古繁華地偏愛元宵影燈戲春前臘後天好晴已向街頭作燈市疊玉千絲類鬼工剪羅萬眼人力窮兩品爭先最先出不待三五迎東風兒童種麥荷鋤倦偷閒也向城中看酒壚博塞雜歌呼夜夜長如正月半災傷不及什之三歲寒民氣如春酣農家亦幸荒年少始覺城中燈市好

祭竈詞

古傳臘月二十四竈君朝天欲言事雲車風馬少留連家有杯盤豐典祀猪首爛熟雙魚鮮豆砂甘鬆粉餅圓男兒酌獻女兒避酌酒燒錢竈君喜婢子鬪爭君莫聞猫狗觸穢君莫噴送君醉飽歸天門杓長杓短勿復云乞取利市歸來分



口數粥行

家家臘月二十五。浙米如珠和豆煮。大杓撩鐺分口數。疫鬼聞香走無處。鍤薑屑桂澆蔗糖。滑甘無比勝黃梁。全家團欒罷晚飯。在遠行人亦留分。櫺中孩子強教嘗。餘波溥霑獲與臧。新元葉氣調玉燭。天行已過來萬福。物無疵厲年穀熟。長向臘殘分豆粥。

爆竹行

歲朝爆竹傳自昔。吳儂政用前五日。食殘豆粥掃罷塵。截筒五尺煨以薪。節間汗流火力透。健僕取將仍疾走。兒童卻立避其鋒。當塔擊地雷霆吼。一聲兩聲百鬼驚。三聲四聲鬼巢傾。十聲連百神道寧。八方上下皆和平。卻拾焦頭壘牀底。猶有餘威可驅厲。屏除藥物添酒杯。盡日嬉游夜濃睡。

燒火盆行

春前五日初更後。排門然火如晴晝。大家薪乾勝豆蕪。小家帶葉燒生柴。青煙滿城天半白。棲鳥驚飛啼格磔。兒孫圍坐鷄犬忙。鄰曲歡笑遙相望。黃宮氣應纔兩月。歲陰猶嬌風慄冽。將迎陽令作好春。政要火盆生暖熱。

照田蠶行

鄉村臘月二十五。長竿然炬照南畝。近似雲開森列星。遠如風起飄流螢。今春雨雹繭絲少。秋日雷鳴稻

堆小。儂家今夜火最明的。知新歲田蠶好。夜闌風焰西復東。此占最吉餘難同。不惟桑賤穀芄芄。仍更芋麻無節菜無蟲。

分歲詞

質明奉祠今古同。吳儂用昏蓋土風。禮成廢徹夜未艾。飲福之餘卽分歲。地爐火軟蒼朮香。釘盤果餌如蜂房。就中脆餠專節物。四坐齒頰鏘冰霜。小兒但喜新年至。頭角長成添意氣。老翁把杯心茫然。增年及爾減吾年。荆釵勸酒仍祝願。願翁尊前且強健。君看今歲舊交親。大有人無此杯分。老翁飲罷笑撚鬚。明朝重來醉屠蘇。

賣癡狀詞

除夕更闌人不寐。厭厭滯鈍迎新歲。小兒呼叫走長街。云有癡狀召人買。二物於人誰獨無。就中吳儂乃有餘。巷南巷北賣不得。相逢大笑相挪揄。櫟翁塊坐重簾下。獨要買添令問價。兒云翁買不須錢。奉賒癡狀千百年。

打灰堆詞

除夜將闌曉星爛。糞掃堆頭打如願。杖敲灰起飛撲籬。不嫌灰浣新節衣。老嫗當前再三祝。只要我家長富足。輕舟出商重船歸。大特引攢雞哺兒。野繭可繅麥兩歧。短衲換卻長衫衣。當年婢子挽不住。有耳猶

能聞我語。但如我願不汝呼。一任汝歸彭蠡湖。

讀白傅洛中老病後詩戲書

樂天號達道。晚境猶作惡。陶寫賴歌酒。意象頗沈著。謂言老將至。不飲何時樂。未能忘暖熱。要是怕冷落。我老乃多戒。頗似僧律縛。閒心灰不然。壯氣鼓難作。豈惟背聲塵。亦自屏杯酌。日課數行書。生經一囊藥。若使白公見。應譏太蕭索。當否竟何如。我友試商略。

淨慈顯老爲衆行化。且示余所寫真。戲題五絕。就作畫贊。

孤雲野鶴本無求。剛被差充粥飯頭。擔負一筵牙齒債。鐘鳴鼓響幾時休。冒雪敲冰乞米迴。齋堂如海鉢單開。衆中若有知恩者。一粒何曾敲破來。千里驅馳出爲人。顏容消瘦老于真。食輪轉後無餘事。莫學諸方轉法輪。何時平地起浮圖。化得冬糧但付廚。推倒禪牀並拄杖。飢來喫飯看西湖。殿中泥佛已丹青。堂上禪師也畫成。笑我形骸枯木樣。無禪無佛太粗生。喜收知舊書。復畏答書二絕。

故人寥落似晨星。珍重書來問死生。筆意不如當日健。鬢邊應也雪千莖。強裁尺素答相思。兩日眵昏腕力疲。牽率老夫今至此。門前猶說報書遲。

重陽不見菊

冷蕊蕭疎蝶懶飛。商量何日是花時。重陽過後開無害。只恐先生不賦詩。

謝江東漕楊廷秀祕監送江東集並索近詩二首

遠道悠悠日暮雲。愁眉今夕爲君軒。殘燈獨照江東集。短夢相尋白下門。卽事想多梅蘂句。有誰堪共桂花尊。斯文賴有斯人在。會合何時得細論。

秃翁衰雪涕垂頤。髣髴三生懶散師。泱髓淪膚都是病。傾困倒廩更無詩。笑看筆格網絲徧。閒數窗櫺花影移。事業光陰今若此。故人休說舊襟期。

范村雪後

習氣猶餘燼。鍾情未濕灰。忍寒貪看雪。諱老強尋梅。熨貼愁眉展。勾般笑口開。直疑身健在。時有句飛來。塵居久不見山。或勸作小樓。以助登覽。又力不能辦。今年益衰。此興亦闌矣。

結廬占城市。初起卜云吉。謁醫并治庖。二事便衰疾。乘除徐自笑。翻覺此計失。經年不見山。無異處暗室。平生痼煙霞。歲晚成俗物。安得百尺樓。屋上高突兀。列岫擁青來。爽氣助佔畢。嘗試與匠謀。工費蟬毛出。俸餘強弩末。家事空囊澁。經營十年餘。高興竟蕭瑟。人生不如意。十事常六七。身今況遲暮。長算屈短日。縱成此段奇。髮白何由漆。且學商山翁。彎跽蟄霜橘。

新歲書懷

門閭知閑好，窗晴與睡宜。歲華書戶筆，年例探梅詩。看長棋三著，量添飯兩匙。豁除身外事，未是苦衰遲。

閏月四日石湖衆芳爛熳

北垞南岡總是家，兒童隨逐任驩譁。開嘗臘尾蒸來酒，點數春頭接過花。盡把園林蒙錦綉，多添門戶鎖煙霞。杖藜想被東風笑，扶卻衰翁管物華。

檢校石湖新田

今朝南野試開荒，分手耘鋤草棘場。下地若下全種秫，高原無幾護栽桑。蘆芽碧處重增岸，梅子黃時早濬塘。田里只知溫飽事，從今拚卻半年忙。

連夕大風凌寒梅已零落殆盡三絕

枝南枝北玉初勻，半夜顛風捲作塵。春夢都無三日好，一冬忙煞探梅人。玉雪飄零賤似泥，惜花還記賞花時。賞花不許輕攀折，只許家人戴一枝。花開長恐賞花遲，花落何曾報我知。人自多情春不管，強顏猶作送春詩。

夢覺作

年增氣血減，藥密飲食稀。氣象不堪說，頭顱從可知。忽作少年夢，嬌癡逐兒嬉。覺來一惘然，形骸乃爾衰。

夢中觀河見。只似三歲時。方悟夢良是。卻疑夢爲非。

